



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 9

Karnataka nung Yeddyurappa
BJP CM candidate asütsü: BJP

TAPAK 8

Airtel, Idea aser Vodafone nem TRAI-i
temerenshi agütsüba ya sorkari reprangdangtsü

VOL. XIV NO. 218 (ADOK 218)

DIMAPUR

SATURDAY

MAY 27, 2017

5.00

DAN legislator 42-i Dr Shurhozelie nungiter

Kohima, May 26 (TYO): State Assembly nung Chief Minister Dr. Shurhozelie Liezietsu züngsem akümtsü atema Democratic Alliance of Nagaland (DAN) Legislature Party-i mulunga agizükogo.

Hokolbar nikongdang State Banquet Hall nung DAN Legislature Party senden ka amendang DAN MLA 60 nungi parnok 42-i iba tenangzükba agi, ta CMO sangdong ka nung metetdaksü.

Iba dak sendakba nung DAN Legislature Party-isa Election Commission of India dang tekaratiba nung Northern Angami-I Assembly Constituency indang by-election agitsü atema mepishia metetdaksü.

May 24, 2017 nü State

Lotteries & Music Task Force Parliamentary Secretary, Khriehu Liezietsu-i tebu nem lenmang lapokja, pa MLA nungi anenba sülen iba assembly menden tazüing aküm.

Taonung DAN Legislature Party senden nungsa, Centre aser NSCN(IM) tsüingda Naga yimten tebilemtsü atema ajaki mulunga aser haihaura kateta telemetba tajung ka agira parnoki menden toktsütsü ta nangzuka aliba ama inyaksü ta maneni bangzünga ayu.

2018 küm tetenzüklen Assembly election magidangsa küm 20 jungnüa olemtep agiyonga aruba atema telemetba ka agitsü asoshi mapa tekaratiba nung inyakang ta India sorkar dang mepishitsü atema senden nungsa bangzünga renem.

Rio indang tazüingba kuli ken o angadangogo

Dimapur, May 26 (TYO): Taoba Nagaland chief minister aser tang teinyakdak Lok Sabha, MP, Neiphiu Rio indang tazüingba kuli dak sendakba ken o Hokolbarnü Chief Judicial Magistrate, Dimapur okadak benoka angadangogo.

Tanü Rio den par kinungertem aser pa pusemertem okadaki aru.

2014 Lok Sabha election nung tokteptsü atema tenüing agütsüdang Rio-i pa tazüingba kulikaket tai agütsü ta February 11, 2016 nü social activist kati Kohima chief judicial magistrate nung ken o benoka liasü.

Tanü okadak ken o angadangba sülen Rio atema okatsür Vitsorel Lcho-i osangbener den sensaksem dang, okadaki telok anaprong nungi ashiba onüktem angaogo aser obendang agütsütsü atema dang anünga lir, ta metetdaksü.

Okadaki onok pusema obendang agütsütsü imlar, kechiyong ken o ji mapang süir ang okadak benok aser ozüing nunga aibelenba anogo nungi tenzükler küm ka tsüingda iba dak sendakba ken o benoktsü atema lateta lir. Rio indang ken o ji küm ana shi süir ang benok anungji, okadaki iba nungji ajemdaker onok metentsütsü imlar, ta Lcho-isa ashi.

Neiphiu Rio nem BA (honours) passed certificate ji aibelena agütsü ta college-ia kuli agütsüogo aser külen pai kecha tamajung mebilemi aser memeti kulikaketji amshi ta shiogo, ta okatsürisa shisem.

Tesüiba mapang college ketdangsertemi Rio nem educational certificate tai agütsüba indang osang metetdaksüogo aser yimjak nung iba atema tadok meshiogo.

India nung nashi yokyayokjiba soter

New Delhi, May 26 (Agencies): Brihostibarnü Ministry of Environment and Forests-i Prevention of Cruelty to Animals Act kübok tetuyuba tasen kar agütsüogo.

Iba Act kübok linük ajungalen shishilembadak nashi ayoktsü atema tepsetba nokdang.

Ministry of Environment and Forests-i tetuyuba agütsüba rongnung kaji cattle business

indang lir aser iba nung shiruru shishilembatsüba alu kiburtem tsüingda dang asütsü ta shia lir. Iba tetuyuba nung nashi, chang aser ud mesükba alu nung amshiba shirurtem ajak dena lir.

Prevention of Cruelty to Animals (PCA) Act of 1960 nung "shirurtem tepsettsü atema masü saka aluyim dang amshitsü atema dang alitsüla" ta shia lir.

(Maneni tapak 12 nung...)

KANGA SASAR

Tir Yimiyim adok May 26, 2017 kar nung, tapak 9 meshitaki taoba mapang adokba tapak den aitepa adokba asoshi kanga sasar aser akseta bilemer. Machine nung inyakerteri menendaki inyakba asoshi tazüingertem dang tadok meshir.

-Yimozülur.

Narendra Modi-i India nung apu talangtiba lapoktsüogo



Assam kübok Dola nung Prime Minister Narendra Modi-i Dhola-Sadia Bridge (Bhupen Hazarika Setu) lapoktsüdang agiba noksa angur. (Dola, May 26)

New Delhi, May 26 (Agencies): BJP-i aniba NDA sorkar küm asem abensaba tenüing nung Prime Minister Narendra Modi-i Hokolbarnü India nung apu talangtiba lapoktsüogo.

Dhola-Sadiya apuji Brahmaputra ayong temdanga yanglu. Iba apu ajanga Assam

nung Dhola aser Arunachal Pradesh nung Sadiya sendakteper.

Kilometer 9.15 tasazük apu ajanga state ana tsüingda senzütsü asoshi ghonda pezü shi ka tatsüba kümdaktsür.

Tanü apu lapoktsüdang PM Modi-i "iba apu ya Bhupen

Hazarika nüngtem nung tenüing jaloktsür" ta ashi.

Tawa tu Patriotic People's Front Assam (PPFA)-i Bhupen Hazarika ji ajak den kasa aliba nisung ka liasü aser pai telok tila-tulu ajak sendakteptsü ta metetdakja liasü.

(Maneni tapak 12 nung...)

MIL aser Skill Education topner nem sempet agütsütsü: PB Acharya

Kohima, May 26 (TYO): Pei tetsü otsü azüingtsü aser skill development jangradaktsütsü atema Nagaland Angh, PB Acharya-i taruba academic session, 2018 nungi Modern Indian Languages (MIL) aser Skill Education subject tem nung tematiba jenjang angur nem sempet agütsütsü ta metetdaksü.

Nagaland Board of School Education (NBSE)-i High School

Leaving Certificate Exam (Class X) aser Higher Secondary School Leaving Certificate Examination (Class XII) 2017 nung tematiba jenjang nung takok angurtem nem sempet agütsüba sentong nung Angh Acharya-i iba osang metetdaksü.

Paisa, HSLC aser HSSLC 2017 kübok Arts, Science o Commerce streams nung tematiba jenjang angurtem nem

senpettem lema agütsü.

Directorate of School Education kübok State Institute of Naga languages tentettsü aser taruba academic session nungi class V nungi VIII tashi nung Alternative English agientsü aser iba melena tetsü oshi ang azüingtsü atema state sorkari telemetbatem agiogo, ta Angh-isa metetdaksü.

(Maneni tapak 11 nung...)

31 buba ATA mungdang meraketa tenzükogo



Longmisa Baptist Arogo Youth Department-i mungdang lapoktsüdang agiba noksa angur.

Longmisa, May 26 (TYO): Ao Theological Association (ATA) pur 31 buba kümsem inti mungdang "Lokti libaliru nung ochi kulisür taküm" (integrity in public life) omen nung ajemdaker Hogulbar aonung yangi Longmisa yimtak meraketa tenzükogo. Iba mungdang nung Aor laishir noklang aika adenshia shilem agia dendaki.

Iba sentong nung Tir Yimiyim yimozülur Wb. K Temjen Jamir-

i tayongzükba o jembidang, tanü ochi mashibaji yimden nung dang masü, saka arogo nunga tashimait aika lir, ochimashiba ajanga taküm nung tetsükdaktsü jenti ajurur, anungji, Laishirtemi itemji shisatokdena bushitsüla aser iba anemaji inyaksüla, ta ashi.

Tanü yimtsüing aser town aika nung school kitem temeimtsü tia nung aliba angur, anungji, arogotemi school-tem jenjang tajungba kümdaktsüba maparen

nung shilem agitsüla, ta paisa ayongzük.

Tenla ki asüba nungi tenzükler arogotemi maparen ajak nung ochishia inyaksü nüngdaker, ta K Temjen-isa ashi.

Ochi mashiba rongsen agi arogo takar akümba aser mission mapa tulu inyakba dang nungibo ochishia alibajisa tajungba aser ibajiang temoatsüba asütsü, ta paisa shisem.

(Maneni tapak 11 nung...)

Tenemtsung lenmang yangluba maparen nung tetsükdaksü ajurur

Dimapur, May 26 (TYO): Nagaland Foothill Road Project mapa ya 2013 küm December ita nung tenzüka liasü, aser maneni iba mapa nung senotsü ajanga tetsükdaksü ajuruogo.

Assam majangi Dimapur aser Tizit (Mon) sendaktepsü atema kilometer 300 dak tema lenmang section ana nung ali aonba mapa anendaka lir.

Ali aontsü mapa kilometer 8 (Naginimora sector nung kilometer 3 aser Niuland sector nung kilometer 5) dang anünga lir, aser iba atema sen crore 11.5 shi nüngdaker, saka senotsü maliba ajanga mapa anena project ajak anenogo.

May 26, 2017 nü Nagaland Foothill Road Coordination

Committee (NFHRCC)-i Nagaland state sorkar dang iba mapa süoki ia asentenshia inyakkdaksüner, kechiyong iba lenmang ya ajanga state rongsenkettsung ajungkettsü, ta mepishia metetdaksüogo.

NFHRCC-i ashiba agi, Chief Minister-i April 27 nü telangzüba tajung agüja aliba atema teinyaksü lir. Iba anogo nung NFHRCC züngsemtemi CM dang iba project indang metetdaksü, aser ali aonba mapa renema inyaksü atema senotsü lemzüksütsü asoshi mepishia liasü.

NFHRCC-i ashiba agi, iba senden nung CM-i senotsü agütsütsüsa jenjang ka nung maliba lemsatepba den külemi

pai iba atema Cabinet den jembiba sülen NFHRCC nem metetdaksütsü ta ashi.

Iba atema CM-i mapangbo atakteta mashi, ta shia NFHRCC-i, tanü tashi nung CM nungi osang kecha mali mesüra pai Cabinet den jembiba asü mejembiar memetet, ta metetdaksü.

April 27 nü CM-i telangzüba tajung agütsüba nung ajemdaker NFHRCC-i CM dang iba onük atema cabinet den mejembii lira jembidaksüner, ta mepishi.

NFHRCC-isa, iba project atema sen crore 70 bo agütsüogo, ajüsüaka tesüba küm asem tashi state sorkari nüburtem meyong project sendoker, ta ashi.

CM Advisor-i MPTCH atema lung azüngtsüogo



May 26, 2017 nü Chuchuyimlang nung Advisor to Chief Minister of Nagaland, Nuklutoshi-i MPTCH atema lung azüngtsüba sülen pa den tangartem külemi tangokba noksa nung angur.

Chuchuyimlang (Mokokchung), May 26 (TYO): Tanü Advisor to Chief Minister of Nagaland, Nuklutoshi Longkumer-i Mokokchung district kübok Chuchuyimlang yimadak Multi-Purpose Tribal Community Hall (MPTCH) atema lung azünga yutsüogo.

Iba sentong nung jembidang Nuklutoshi-i, state chief minister Dr. Shurhodelie Lezietsu-i pa CM kümliyongi Chuchuyimlang nung multi-purpose tribal community hall yanglutsü atema senotsü agütsüba atema pa dang pelaba metetdaksü.

Pai ashiba agi, community hall ya ajanga Chuchuyimlang Village Council aser yim nüburtem nüngdak balala aika tongzüksü.

Paisa village council

zungsemtem dang iba community hall ya Ao kin sobaliba ajungkettsütsü atema amshitsü ajungshi.

Paisa, construction committee-i akokba tashi mapang tatsüba agia iba ki renemtsü atema merangtsü, koba ajanga yimadak nüburtem anisüngzüksü, ta ashi.

Tesasaba olen ka nung pai, committees aser council tsüngda tongtepratep junga maliba aser senotsü maliba ajanga lung azüngtsüba sentong ya tamalen magiteti liasü, ta shisem.

Kasa sentong nung Chuchuyimlang Village Council mendenbuba, Ao Sanen Pongen-i, küm 20 jungnüa yimertem community hall maliba ajanga timtemogo, kechiyong 1930s mapang nung

Mejensanger Putu-i yangluba community hall ji mi agi rongdok, ta metetdaksü.

Yimertem community hall tasen yongyar, ta shia pai Advisor aser construction committee dang iba hall tekaraba nung yanglutsü mepishia metetdaksü.

Kasa sentong nungsa Chuchuyimlang Senso Mungdang Tir, Tsuknungmatong aser Bendang Ali Chuchuyimlang Senso Union (BACSU) nungi T. Maong Longhchar natia o tatsütsü jembia liasü.

Sentong tenzüka Chuchuyimlang Village Council Secretary, Tsukjemtangit-i lokti pelaa agizük aser iba sentong ya Baptist Church Chuchuyimlang Pastor, T. Lima leniba nung agia liasü.



Mokokchung, May 26, 2017: Hotel Whispering Winds, Mokokchung nung Retail Customer Interaction (RCI) training tembanga agiba sülen tesayurtem aser training agirtem külemi tangokba noksa nung angur. Iba training ya Mokokchung Entrepreneurs Consortium aser YouthNet nati senteper ayongzük, aser iba ama training ya tang state nung mezünga kaogo.

AO SENDEN KETDANGPUR TASEN SHIM

Taoba küm Ao Senden menden nung timtem kar adoka Ketdangpur ajaki pei menden nungi anenadoker Acting President aser Acting Secretary-i dang maparen ajak bener aruogo. Ajioda Ao kin ya Naga kin asoshi nükrangdong aser Ao Senden ya Aor ajak asoshi tematiba sabang asünung, sübotsü tabensa agi Ao Senden menden meraketa wazüka ayutsü nukjidong nung temzüng nung agüja aliba tashi nung ajemdaker Ao Senden menden kibasü agi mendenpur tabensa shimogo. Naga kin tejakleni anitsü asoshi samanir kin ka ama wajak nung noktaker Ao kin telongjem ka kübok janyu medema anitsü Ao kin-i temulung lemteta President Wb. Imliyangar (Longsa), Vice-President Wb. Chubawati Longchar (Nokpu), Gen. Secretary Wb. S. Tamsu Aier (Mopungchuket), Asst. Gen. Secretary Wb. Arentemjen Jamir (Akhoya) aser Finance Secretary Wb. Aomeren (Moayimti), tanü item lenir kapu nung Ao Senden maparen ajak nungloksür. Anungji nenok nübu, shisatsü aser mapang ajak tenlaa asen Ao kin anidang takok lidakjang ta Aor yimkong Tsüngrem temoatsü nenok nem waloktsür.

Sd/-
(Wb. C. Angang Jamir
Acting President

Sd/-
(Wb. L Tally Lkr
Acting Secretary

Nagaland Bar Association senden ayonger

Dimapur, May 26 (TYO): Nagaland Bar Association (NBA) lokti senden June 2, 2017 anüngdang 11:00 ako nungi NBA office, Deputy Commissioner office, Dimapur nung kanga tongtibang onüktem

nung o lemtepsü, anungji züngsem ajak iba senden nung arua adentsü mepishia metetdaksür, ta tanü Nagaland Bar Association General Secretary, V. Hukavi Zhimomining amentsü, aser iba senden i sangdong ka ajanga metetdaksü.

Co-operative societies, Mkg sangdong

Mokokchung, May 26 (TYO): Co-operative societies, Mokokchung, Asst. Registrar, Alangla Tonger-i tanü sangdong ka ajanga co-operative societies dang sen apua alir ajak dang tekaratiba nung sen apua aliba agütsütsü metetdaksüogo.

Sentsüh magütsür society tem dang iba Act ozüngtem nung aliba ama inyaksü, iba den külemi mapa meinyakba society tem jangjatsü aser jelia osang magütsüi parnok indang registration anentsütsü, ta sangdong nungsa metetdakja lir.

Mkg nung Mental Health training agiogo



Mkg, May 26 (TYO): May 25-26, 2017 anogotem nung IMDH Mokokchung nung health centre ajak nungi nurse tem atema Mental Health Programme ka kaogo.

Iba sentong nung Medical Superintendent IMDH Mokokchung, Dr. Medem-i training agirtem pelaa agizükdang, medical ketdangsertem densema ajak atema tekolok-shisatsü anema aliba onük ya tasen ka lir, anungji shilem agir ajaki nendaka angazüksüla, ta ajungshi.

State Programme Officer on Mental Health, Directorate of Health & Family Welfare Kohima, Dr. Khriezothou Paphino-ia shilem agirtem dang Mental Health onüktem nung shisatsü arangshitsü ayongzük.

CMO Mokokchung, Dr. S.S. Akaba-ia nurse tem dang pei tajungtiba agi iba training nung adentsü ajungshi.

Shisalen sayur, DPO (RCH & UIP) & Nodal Officer DMHP, Dr. Tamsuyanger-i Mental Health Care dak sendakba nung nurse tem shilem aser teinyaksütem metetdaksü.

Pai ashiba agi, mental shirangba ya shisatsü tashidak ka lir, aser iba nungji teshisadangba mesüra yimyatsüya nung timtem alir, koba ajanga taküm nung nüngdabatem meinyakteter.

District mental health timtem indang jembidang Tamsuyanger-i, DMHP OPD-i aruba ajema lir, aser ibaji talisa mental tashidaktem indang rajema maliba ajanga lir, ta metetdaksü.

Ano shisalen sayur, Psychiatric nurse DMHP, Ajungla-ia 'Anxiety & Mood disorder' indang lemsatepa liasü.

Iba training nung sub centre, IMDH, Woodland Nursing Home aser T.B Hospital densema health centre ajak nungi nurse 80 aden.



Guwahati, May 26: Ato Kelonser, Narendra Modi-i 2017, May 26-nü Guwahati, Assam nung AIIMS (All India Institute of Medical Science) yanglutsü atema nungshilong sayatsüba noksa nung angur. Kasa noksa nung Assam Governor of Assam, Banwarilal Purohit, Chief Minister, Sarbananda Sonowal aser lenirtem-a angur.

Tawang nung Mortar ka apokdang mitkar ka pokset, trok yiru

Itanagar, May 26 (Agencies): Brehostibarnü Arunachal Pradesh nung Tawang anasa 'firing range' ka nung mitkartem 'exercise' agiba mapang mortar ka target medongteti apok aser iba lendong nung mitkar ka pokset aser trok yiru.

Iba lendong nung yirur aliba mitkartem ya helicopter nung Tezpur-i bener ao. Yirur alir rongnung mitkar asem iba mozüki nung anepaludar aser kanga mejungi yirur aliba mitkar asem Kolkata nung aliba mitkar indang Command Hospital-i bener ogo.

Iba bomb tongtetsüba tesem

metongteti apokba ya technical tsütsü meshidakba ajanga alitsü südi, ta osang ajanga ashi. Iba prangpong aser injang ya tendangtsü. Injang ya meshidaki lira injang ajunga ya tanaben teyangludaki meyiba yoktsü.

Iba lendong bushisüngdangtsü asoshi totuyuba agütsüogo aser iba osang ya anogo ter tsüngda nung angutsü imlar.

"Iba ama lendong ya kodanga madalokba mapa masü, saka takum samaba ya tia maka," ta retired artillery officer kati ashi.

Iba lendong adalokdang takum samar aser yirur aliba

kibungtem dang iba osang agütsüogo. Tawang ya Arunachal Pradesh nung 'remotest outpost' ka lir aser iba tesem nung aliba mitkartem ya timtem aiben ajurur. Tawang dang ya 'Little Tibet' ta ajar aser iba tesem ya India kübok lir saka China-ia par li, ta ashir aser India o China tsüngta tesendaktep ken o nung iba linük ya aiben atsüteper.

Rajasthan nung aliba Jaisalmer district nung 2016 küm January ita nunga iba ama lendong ka adalok aser iba lendong nung Border Security Force nungi nisung ana pokset aser pongu yirua liasü.

Refugee tem Mizoram nungi pei kidangi meyiba ogo

Guwahati, May 26 (Agencies): Myanmar nung aliba Arakan Army (AA) temi taochi melie reshikangshia merenshiba ajanga Myanmar nung aliba Ralei yimtsüng nungi tetsür aser tanur timba nisung 338 tashi arrtsü alema arua jenoka aliba tanaben par limai Bodhbarnü meyiba ogo.

Taoba Hokulbarnü item yimdaklirtem ya international arrtsü ya alema south Mizoram tsütsü Saiha district kübok Lungpuk aser Khaikhy yimtsüng nung aliba kaket reju aser community hall nung arua jenoka

liasü. Arrtsülen aliba Assam Rifles (AR) aser Saiha district ketdangsertemi item nisungtem nem nungdakba lenmang sayua teyari agütsü aser iba yim ana nung aliba nüburtemi chiyongtsü aser tanendak agüja liasü.

"Item nisungtem ya Mizoram nung mapang talangka jenoka alitsüsa mapang aru saka AR aser Saiha district ketdangsertem amalitep teyari ajanga iba tensa agienogo. AR den district ketdangser, police aser Lungpuk nungi yimden yimsüsürtemi lenmang sayua parnok ya lendong timtem kicha melie kidangi meyiba

yoktetogo," ta Defence PRO, Lt Col Suneet Newton-i ashi.

Item refugee tanaben par limai meyiba yokba sentong ya India aser Myanmar indang international boundary pillar No 15 nung Bodhbarnü agi. Ralei yimtsüng nungi yimden yimsüsürtemi anir lenirtem arua par nisungtem tanaben kidangi anir ogo. AA telungpurtem ya Ralei yimtsüng aser temeket tesemtem nungi memetetba tesem-i ogo aser yimdaklirtem ya tanaben kidangi meyiba aotsü junga lir, ta item refugee anir arurtemi osang agütsü.

Assam nung Ato Kelonser-i agro-marine processing scheme SAMPADA sayatsü

Gogamukh, May 26 (Agencies): Chiyongtsü yangluba ajungkettsü aser lanurtem nem mapa agütsütsü nükjitong nung India Ato Kelonser, Narendra Modi-i agro-marine processing scheme, SAMPADA, Hokulbarnü sayatsüogo.

"Aluyimba nungi adokdaksüba chiyongtsütem ajanga teyari agütsütsü lenmang aika lir aser sen crore 6,000 jenjang SAMPADA (Scheme for Agro- Marine Processing & Development of Agro-Processing) ajanga chiyongtsü yangluba industry nung teyari tulu agütsütsü aser lanurtem nem mapa agütsütsü," ta Modi-i Dhemaji district nung Indian Agricultural Research Institute yanglutsü atema long azünga yutsüba sülen ashi.

"Tetenzükdang sen crore 6,000 indokotsü aser tatsüka lir sorkar aser nija tesendaktep nung inyaksü aser iba nung foreign direct investment (FDI) adentsü," ta Modi-i pai aniba sorkar tenzüker küm asem ajungba benjungmong tenzüka mapang ashi.

"NDA sorkar küm asem ajungba mapang aluyimba

sector nung talisa linük nung aliba lanurtem asoshi takoktsü aika lir ta osang agütsütsü ni lemtetogo," ta pai ashi.

Juice aser pickle ama terenem chiyongtsütem ajanga aluyimertemi adokdaksüba chiyongtsütem nung jenjang tajungba kümdaktsür aser kasa mapang nung employment aser bendangleni bener oa ayoktsü maongka agütsür, ta pai maneni ashi.

"North-East ya India tasenba nung engine tasen asütsü aser NE tetezü ya 'new economy', new energy' aser 'new empowerment' akumtsü," ta iba scheme nungi North-East nung aliba lanurtem dang tajangzüik bushitsü ajungshiba mapang Modi-i ashi.

North-East ya linük den tesendaktep tajung yangluba kisüng masü saka rongsenketsüng tsütsü tiyongtsü ka akumtsü asoshi takoktsü lir, ta pai shisem.

Aser iba nükla koktetsü asoshi highways, railways, waterways, airways, aser I(information)-ways indang ki-o-jen terenlok nung temolung agütsür item lenmang pongu nung jajatsü asoshia Ato Kelonser-i ajungshia liasü.



New Delhi, May 26 : Indian Air Force ajanga agütsüba noksa ka nung IAF Su-30 MKI jet raksar prokshia aliba angur. Iba tayimtsü nung pilot ana mener aser Hokulbarnü Tezpur, Assam nungi kilometre 60-shi bilar aliba arem temelem ka nung ngutet.

CPI-Maoists pur 5 bendanga agütsü

Guwahati, May 25 (Agencies): Ato Kelonser, Narendra Modi-i state mesemdang tsüngda Brehostibarnü CPI-Maoists telungpur parnok 5 Assam police matsüngdang bendanga agütsüogo.

Assam Police, additional director general (special branch) Pallab Bhattacharya-i ashiba agi, Moina Dohotiya-i anir Maoist pur parnok pongu tetsür ka dena police dangi aru. Parnoki parnok temai adoktsüba asoshi telemtetba metetdaksü.

"Maoist pur parnok isheka

anunga lir aser onoki parnok temai adokdaksütsü asoshi merangdar," ta Bhattacharya-i ashi.

Iba telungpur telok yagi Arunachal Pradesh nung parnok telok amenoktsüba aser Manipur nung People's Liberation Army of Manipur den sendaktepsü asoshi Assam ya lenmang ka ama amshir. Maneni parnok ya ULFA-I purden kanga junga sendaktepa lir. Security osang ka ajanga ashiba agi, Garo telungpur teyari ajanga Meghalaya nung par telok amenoktsü asoshi merangdar.



Agartala, May 26 : Hokulbarnü Agartala nung Tripura indang BJP headquarter jakdang Congress busemertemi centre nung BJP-i aniba sorkar küm asem ajungba anema yimyim ayima nokdakba mapang tangokba noksa nung angur.



TIR YIMYIM

YIMOBILEM (EDITORIAL)

DIMAPUR SATURDAY, MAY 27, 2017

ISIS 'caliphate' aser 'Hindu Rashtra' tsüngda tepila mali

- Among Aier

Tanü alima nung ISIS ta ajaba Islamic kiralongrar teloki linük balala nung ozüng alema mapa inyakba aser talisa Khristantem dak tenük yoka reshikangshiba aser tepsetba ajanga, linük aikati iba telok ya alima nung khuret ka ta züngshia, parnok anema mapa inyaker. ISIS anema raraji United States (US) tongti sür inyaker aser tang tashi nung alima nung linük 68-i US den yaritepa ISIS samatsütsü atema mapa balala inyakdar. ISIS indang nükjidongji 'caliphate' ka tentetsüba aser iba tetezüji Muslim yimsüsür ka kübok yimtenyimli ka tenzüksüba lir. Parnok indang nükjidongji, Sharia ozüng kübok Islamic yimli ka tenzüksü aser iba yimli jagi alima madak yimsü asütsü indang lir. Asenoki tatalokba meyipa repringdangra, ISIS-i Khristantem anema mapa inyaker aser parnok par yimli atema mapa inyakyonga arudang, tenlaki aika raksatsüogo aser Khristantem aika tepsetgo. ISIS-i meimchir anema aser taochi melii inyaksangshiba atema alima nung linük aikati tebilemetsü aben aser parnok ISIS anema raratsü aser mapa inyaksü mulungtet aser iba telok samatsütsü meranger. Ajidang masü, alima nung telok tematiba United Nations (UN) tsüngdang ISIS anema ken o benokba aser osang agütsüba nung ajemdaker UN Security Council-ia iba telok aitsüogo aser UN-i ISIS ji 'kiralongrar telok ka' ta züngokogo. Asenok aliba linük, India nunga repringdangra, tali bilemloka oa amanger Hindu nungertemi ISIS mesüka inyaksangshiba angur. Hao, India ya Hindu nung nütüng teimba sür aliba linük ka asünung, mapang shia nübo agi tangar memenepba telok mesüra yimsütem dak Hindu nungeri ozüng alema mapa inyakbaji ataloka arur. Ajisüaka, tawa tanü ka India nung Muslim aser Khristantem anema mapa inyakba kanga bulua ataloker aser asenokia item osang balala angashia arudar. 2014 küm Centre nung Bharatiya Janata Party (BJP)-i sorkar akümba sülen nungi Hindu teloktemi nübo agi tangar memenep aser Khristantem anema kanga dang bulua mapa inyaksü tenzük. BJP-i sorkar ketdang asüba state aika nung reshikangshi ajurur aser state aika nung sorkari nashi metepsettsü aser nashishi machitsü/yokyayokji masütsü indang ozüngtema yanglua tenokdangbatem agütsüogo. Iba ya ajanga BJP ji Hindu tangatetba aser tesayuba sülen anidakba telok ta sayur, kechiyong Hindu nungeri nashiji par tsüngrem ka ama külemer. Kechiba BJP lennirtem aser yimten yimsüsürtemi yamai inyaker ta süra, BJP ji Rashtriya Swayamsevak Sangh (RSS) indang yimtenren kongsang ka ama lir aser parnok 'Hindu rashtra' ka tentetsü alizüng lir. 'Hindu rashtra' tetezüji Hindu linük lir aser Hindu nung teloktemi India ya Hindu linük ka kümdaktsütsü atema alizüng lir. RSS tanishisang Mohan Bhagwat-i 'India ya Hindu linük ka lir' ta shiogo aser külen Uttar Pradesh Chief Minister Adityanath Yogi-ia "Hindu Rashtra indang bilemba atema kecha tai mali. Supreme Court-ia Hinduism ji nisung taküm libaliroba yimya ka dang lir ta shiogo" ta ashi. "Hindu linük ka akümba ajanga nübortem taküm tajungba litettsü aser parnok tepela angutsü süra, nisung shingaia Hindu linük ka akümtsüba anema menokdaksüla aser mebilemetsüla" ta Yogi-isa ashi aser pai jembiba olenji BJP-ia pusema nungitogo. ISIS-i alima nung Muslim yimsüsür ka kübok 'caliphate' tentetsüba aser India nung Hindu nungeri 'Hindu rashtra' tentetsüba tangatetba tsüngda kecha tepila mali aser iba tangatetba anaprong nung lendong tulu keta lir. Linük nung sorkar ketdangsuba yimtenren telok kati yamai odiodia Hindu linük ka akümtsü atema jembiba aser mapa inyakba pusema nungitra, tanüngba tamangba yimsütem kechi tia nung yutsür aser parnok kechi jenjang nung lidar ta asubaji jungjunga shisadangtsüla. Khristantem mesüra Muslim nung anema mapa inyakba atema aiben telok aser kijatemi Centre sorkar dangi, Prime Minister, Home Minister mesüra India Tir mesüra state chief minister tem dangi temepishishiba shiditem aiben züluogo. Ajisüaka, India linük nung yimten yimsüsür aser tematiba jenjang nung ketdangsertem teimba Hindu nung dang asünung, aser parnok nübo teimba sür India linük ketdangsur asünung, Khristan aser Muslim nungeri aginüba ama mataloki mesüra telangzüba tajung mongui dang arur. Anungji, ISIS-i 'caliphate' tentetsüba nükjidongji majung aser lendong keta lir ta alimai ajiteta, iba telok samatsütsü atema mapa inyaker süra, India nung Hindu nung masüba nisung aser teloktemia India sasep nung takhangba agütsüba mesüra temepishiba shiditem mezülui, United Nations dangiang indangindanga iba khuret indang zülutsüla. Aji asünungdang, India nung Hindu nungeri tanüngba nübo agi memenepertem reshikangshiba mesüra amakba khuret ya alimai jungkai adoka metettsü aser iba sülen jiang iba khuret ya azüoktettsü.

OLEMSABANG

Ao Lima "Land Of Revival"

I.Imdong Jamir, Sungkomen

(Yashi adok nungi...)

Iba Revival Ao tekong tenem ajak nung jangrüyonga aodang alu nung alu yangtep yangtepertem temoatsü meshia sarasadem dang tetsür, tanur, talisa tantsür aikati shin, shin o jembimeso aluang meinyaki pungtepersa tenlaki bushia kinunger ajak otsü obou nunger tejen temenen kakteta jeptep meso. Ibai alemli Ezra ainkar tendak atalokba mesüka Aolima nunga atalok. "Tang Ezrai sarasadema aser tai nangzüka jeba mechiocker Tsüngrem ki madang alidang pa dangi Israel nungi tebur, tetsür aser tanurtem telok tulu külemi sentep kechiyong nisungtemi kanga ajeb. Ezra 10:1. Ibai chijiba Revival tuluji liasü. Yirusalem Revial nung Peter, Yakob, Yohan nung lennir sür Revival tulu agiogo, par asem mesüka Rev Arsenba, Rev. Riküm, Rev. Lanu Longchar par asema ogo. TEMESHIPUR SAMAR ASER NISUNG SHINGAIA TEMULUNGJANG NUNG MAYUR. Isaia 27:1 kodang Senai tenem nung Mosai kibua ajuru Revival tulu adok, Mosa sentsü kenyongi melenadok saka pai memetet. An 34:30. Temeim asen Ao kin 1976 küm kibubai tatemzük Revival milak yipru tulu asen limai meküpzüka yokba ya tesüngmangtsü taochi, iba Revival asen Ao Arogotem, aser tamanger tem nungi moi monga lir ta Tsüngremi ashir. TSÜNGREMI ASEN AOKIN SAKLOKBA YA KECHA DENA ATISHITEPTSÜ MAKOK, PETINU DANGA TALANGBA MOLUMI DANG TAROKBA, PA TEMEIM INDANG ZÜLUTSU MOLUTZW AGI MEPERITSÜ, KAKET ANÜNG TAKA LIAKA MEPERITSÜ. Osang kaketem repringang HSLC, HSSLC, NPSC, UPSC nung asen chir, asen semchir, kwika tematiba takok jenjang nung aniketa lir. Dr.S.C. Jamir shiba Indian tamarener lakh sa lakh chuba Tir rongnung atongsemtsüsa oda alemli BELASHAZZAR chuba mapang Ibri nung Daniel kibuba Tsüngremi shimtetsang, Babylon yimli nung petinu takzür, anüng petinu azünger Kaldi nung ajaki Daniel shisatsü, nungdaka bushiba ama, asen lenir Dr. S.C.Jamir den shisa lemsateptsü par kilempoki arubaji atamata. Tsüngremer maongka tulu, koda tulu. Asen kin ajaki ozü lenir nai Daniel amshiba ama amshiang arishi talang agüjang ta sarasademdi. Pai anir asen Naga kin chirtem kaket, pen, amer India lima shisaluyimer kwika pakoka lir, prangpong apur chuba tir mitsa nung, tsükchir tongpang nung kwi nokdaka lir. Anüng küpok alima kin US o China-i anir kin 14 nung asen Ao senso mezüng Rev. Dr.Alemmereni anir parnok 100 tera majung Yisu Khristar lu nung nokdaka lir. Item asoshi asenok ajak temulong ka, tanüla ka, nükjidong ka sür kukua sarasademtsüdi arung.

Alemli Scotland nung John Knox-i Oh Kibuba anüng Tsüngrem kü nem Scotland kua ta sarasadema ama, oh, kibur Tsüngrem, Abraham, Isak, Yakok Tsüngrem ozü Aolima ya "LAND OF REVIVAL KÜMDAKJANG" NAGA TENEM NÜPOR YA OZÜ NEM AGÜJANG ta ayimtena sarasademtsüji tanü mapang lir. Temeim Ao Arogo sannükertem, Tsüngrem kangki aputsü jatertem tanü anogo ya kibubar Aluruwa mapang MOTSÜNGNEM NUNG KIBUBAR MO ANETBA MAPANG. Tongti o jembirji nenok asütsü, counsellorji Arogo tenzük, tenzüklatem Revival tenzükang kotak yimli asenok rongnung lir. ALIMA NUNG AROGOTEM RESHIKANGSHI TENZÜKOGO. 1955 küm American Missionary temi tadi temeim Aokin asenok küm 80 tashi külemi liogo. Tanü onok adoker, nenok meketa aliba kin ya repringang ta o tempanga jembir pei pei khu benloker apusoa ogo. Dr. Clark-i ni Burma leni onür sürnung kü mapang süiogo ta pai olen kar jembia lir. Hosea ainkari yamai jembia. Kechiyong ni tetepsetba tenla masü temeim takang aginer, aser tarongba tenla masü Tsüngrem metetba shisatsü aginür. Hosea 6:6 Lakh, lakh tenlabajia kanga tajung saka aria meima, memetetba, tezü, arem shiruru tia nung aliba Yisu memetet lakh aikapur asoshi temeim nung Tsüngrem metetba shisatsü agi temeim mapa asen kiyongertemji meimtsü tanü mapang lir.

Nehimia ainkar mapang Daniel ainkar mapang Revival tulu adok, saka Revival anemerji talubosa dang liasü. Kibuba Yisu mapang nung, Revival atalar menutsür tem den pai jembiba o tem aiatai Kurasin, Aiatai Bethsida, kechiaser koba mapa tulu nenok rongnung inyak aji Tair aser Sidon nung inyak asübo parnok anem sü abener aut mezür alemli temulung meyiper lila. Mt. 11:21 Aser Kapernaum na anüngtonga mesotsü ama? Na tasüyimi alutsü. Mt 11:23. Kenü anogo Kapernaum yimti nung kidangji nisung jenti sentep nung masem, togimra agi shirangsang par pezüi apuloker aruba kilem rakpoker Kibuba Yisu dangi yok Mark. 2:1-4. Yamaji Kibuba Yisui Kapernaum nung asoshi mapa tulu inyak saka par yimeri temulung temerangba, asükum. Mapa tulu sayuba ajanga Yisui item o tulu jembio.

1738 küm England lima nungi tanüla ainketer, tanüla mongin o jembir sarasademer ainkar ka tenüng agi GEORGE WHITEFIELD liasü. Saka England nungeri magizük. "Jealousy among the ministries closed the doors of all the churches against Whitefield in Bristol, so he went to a notorious area of the city called Kingswood and preached in the open air. Kingswood was a rough Four thousand acre district at the edge of Bristol where coal miners lived." Otsü agi ashir, Yisu memetetba tezü nüpor, tanüpoksüng ayangertem alidak Revival tulu adok. Iba osang alima ajakleni prokshi. Iba sülen pa America limai ao. Tamangtir Jehoshafat chuba mapang nung Yirusalem yimti amaktsü asoshi, Amon, Moab aser Seir nung meyirjang aiga aruba amokmeren osang angashia Jehosafati par sepoy tem anir ken atentsü tenzük. Kibubai tsükchir tongpangji chitaktsü. 2 Puti 20:22. Kibubai parnok asem "Kechiyong tongpangji nenok meyong masü; Kibuba meyong lir." 2 Puti 20:15(a) Shien o ka nung "MUSIC IS FOOD OF THE SOUL"

Temeim tazüngertem, Revival tanüla agizükertem, bendanga amangertem. Temeshi laishiba medoktsüi shirnoki sapua azünger pa/la den tanüla teti jembitsü. Kodang, koba Arogo, koba yim Revival sendong sannükeri anir apusodi, tamasa temenen mojingi yakbang süadoker. Shin o ka yamai lir: WHILE TRUTH TRAVELS A MILE, LIE GOES ROUND THE GLOBE. Alemli D.L.MOODY o SANKEY na England limai Revival agütsüi apuso, Arogo kati ajaba ao. Tenati Queenstown atongdang Revival sentep sentong yanglur tenzük asemprongla aoksdang süadoker liasü. Iba tia nung liaka sentep akatsü osang prokshi, mezüng sentep nung nisung 50 dang aru. Sentep temer asangur ka kü dak nemeta sarasademjang ta arua apudak, tenati sarasademtsüdang asangubai ashi, kü dak nungi asükum temenen tanela tokogo: Isaia 13:11(a) Züngdangang. Iba sülen iba Arogo nung Revival adokba otsü lir. Asen Ao kin-i asen meketa aliba kin temdak kanga meimtsüla ta Tsüngremi ashir temeim kodanga majentsü. 1 Kor 13:8 (a)

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Nisung tsungdang shidak mesükba lenmang

-L. Kika Pongener, Aoyimkü, Dimapur

(Taoba adok nungi)

Aiben tang asenok nisunger libaliro nunga ibai mesüka tensa mapang ajurur, nisung tsungdangbo shidak amai dang, saka Tsungrem tsungdangbo meshidak ta asüba tensa tia aika ajurur. Tanü asen lokti nung, kibong nung, aser kija taküm nung asenoki rongsen tulu tajangzük angutsü penbudang, asenok taginüba nükjidong kar ataloktsü arishidang, aser loktiliba nung tashi raktepdang, aiben Tsungrem amaadoker meromerua, ambangyima aser tashiyim agi inyaker aser Tsungrem anema aibelener.

Aiben dang lokti tulu dak temulong lemer takok asa-a inyaktepdang, nisunger tsütsü nungibo shidak ama, ajisuaka Tsungrem tsungdangbo meshidak ta inyaker atar. Israelpurtemi lokti tulu bangjemer süngyangu yanglur külemtsü asoshi par lenir Aron tang khang meshi, aser aji mesoitte lenir Aroni Nashi chanu ka yanglur külemdaktsü, anungji iba atema Tsungremi kanga mepela.

Aiben dang asenok meimchirtemibo lokti tulu dak rangloker, kobala shidakba aser meshidak aji mebendangteter, aji oda, nisung tsungdangbo shidak amai dang bilemer inyakba mapa nung, mapang kar nungbo Tsungrem lartem aser Tsungrem-er wadang nung tenzükertema dena aibelentsüsa tensa mapang-a ajurur.

Alima temzung-ozung agibo lokti teimbai kechi mulonger aji shidak ta ashitsü akok, ajisuaka ibaji Tsungrem tsungdangbo meshidak asütsü akok. Yisu Khrista anema taitüba kuli aika bendener Yihuda nunger Farise aser Sadukitemi aitsü, parnoki Yisu Khrista dang Yihuda nunger chubaji na asü ??? ta asungdang.... ajisuaka ano parnoki meyiper Yisui pa sasa pa Yihuda nunger chuba-a ta ashir ta aitsü. Farise aser Saduki lenirtemi Kaisar nem alimelen agütsütsü tim asü masü ??? ta asungdang.... ajisuaka ano meyiper Yisui kaisar nem alimelen agütsütsü nokdang ta aitsü. Aser lokti tulu longjemer kenbang-obang ka ser bangjemer aitsür asünungji, Pilate chubai-a Yisu Khrista kangki nung meta-a tepsettsüsa tai kecha mengu-aka, lokti tuluji tsübuba agi Yisu-ang aitsütsüsa tensa mapangi bentsür aru. Kechiba süra tip külenji reprangdangra Yisu Khrista pa kija dang, pa atema kuliser shinga maliasü, oda pa nütüngtem-ia dena ajaki pa toktsü.

Ajisuaka Easter Sunday anepdang kodang Yisu Khrista tasüba temenen madak takok ngur shia aru, parnok ajak matsungdang Yisu Khrista temeden angu. Aji oda asen meimchirtemi aiben dang ochiba aser shidakba mebendangteti inyaker, aser idangji Tsungrem anema aibelentsüsa akümer. Nisung tsungdang shidak mesükba lenmang kar lir, ajisuaka Tsungrem tsungdangbo meshidak, aser iba tatempangji ashiko tasüba lenmang asütsü akok. Anungji asenoki nisung tsungdang shidak mesükba mapa nung masü, saka Tsungrem tsungdang shidak mesükba mapa inyaktsü, Tsungrem tsungdang shidak mesükba lenmang nung jajatsü, aser Tsungrem tsungdang shidak mesükba mapa nung nokdaktsü aser tenzüktsü merangdi.

"Tsungremi iba o ajanga tazungertem ajak moajangma"

Bulgaria nung Khristantemi ghonda 7 Bible marathon agi

Sofia, May 26 (Agencies): Bulgaria linük kübok Sofia nung alirtemi Bodbarnü sentong tajung ka ayongzuka agiogo aser ibaji ghonda tenet atema 'Bible-reading marathon' agiba liasü.

Marathon ayongertemi ashiba agi, Bulgaria nungertemi asen Khristan maitsümeyipa arudaktsüsüla, ta Evangelical Focus osangkaket ajanga ashi.

May 24 nü Bulgaria nung 'Day of the Cyrillic Alphabet' amungba mapang 'Bible-reading marathon' ayongzuka agi.

Alemlü missionary adianu ana-Cyrl aser Methodius nati Laishiba Slavonic oshitem nung meyipzüktsü atema

ojang tasen purapitetba sülen küm 1,150 ajungba tenung nung 'Day of the Cyrillic Alphabet' amung.

'Bible-reading marathon' nung wadang balala nungi nisung 50den temai shilem agi aser parnoki Sofia yimti tiyongtsü nung Laishiba lemsar azung.

Iba sentong nung Eastern Orthodox, Roman Catholic aser evangelical Protestant Christian tem külemi longjemer shilem agi aser yimsüsürtem rongnungia taoba Bulgaria healthcare minister Dr Ilko Semerdjiev aden.

Putu 9buba nung Cyril aser Methodius nati purapitetba ojang tasen dang Cyrillic ta

ajar aser iba ojang ya tang-a Bulgaria aser Europe kübok Macedonia, Serbia, Bosnia and Herzegovina, Ukraine, Russia o Belarus linüktem nung amshir.

Bible marathon ayongertemi ashiba agi. 'In the Beginning Was the Word' omen nung ajemdaker agiba sentong ya kümshia agitsü imlar.

'Word' Association ketdangser Alexander Urumov-i iba sentong ya tanga Bulgaria jilatem nunga agitsü sentong lir.

"Tanü asenoki (Bulgaria nunger) asen Khristan maitsü shia arudaktsütsü kanga nungdak" ta Urumov-i metetdaktsü.

ANO GO ABEN TSÜNGREM DEN

KOTAK SENTSÜWANGSHI ATADAR

"Kibuba matsungdang pa temeshipur asüba senti lir" - T.Ken 116:15

D.Martyn Lloyd Jones, pa ya sayutsungir ka liasü, pa taküm tatemlen kati arua shirangba yipden nung alidang, pai yamai ashi, ni shirang ajungtsü atema joko sarasadem tesütsü ta pai paper tila ka nung yamai zülu, "Sentsüwangshi asoshi ni sota teyu" taküm ya senti asünung, aseni meima aliba takümtem alima nungi pilaa kotaki aotsü mapang bener arutsü dang, asenoki parnok salaa yoktsü tasak lir, Aji saka Tsungremi pa kidangi ajaba sentong nung, pai mapang ka atakzükja lir. T.Ken 116:15 nung yamai ashir, "Kibuba matsungdang pa temeshipur asüba senti lir".

Kodang Pauli pa asütsü anasa lir ta angu, kotak nung pa atema kechi yuja lir iba jagi pa kanga ajungmeso. "Tang nungi ni asoshi temeshiba korang, koba Kibuba ochi O bendangbai kü nem dang masü, saka shiri pa jungkai adokba dakji meimer, parnok nemjia agütsütsü" (2 Tim 4:8).

Filipi 1:23 nung yamai ashir, "Khristan ka taküm lenmang nung kong lidir liaka, parnok tatembang alizungjibo Khrista den alitsü, koba ajak dang tajungtibaji lir"

SARASADEM :

Kotak sentsüwangshi atadar, Tsungrem shir dak shirnokisa amanger, Kodang asenoki kotakerji ngudir, Ibaji asenok asoshi teimla tulutibaji lir. Amen

Egypt nung Islamic kiralongrartemi Coptic Khristan 26 tepset



Cairo, May 26 (Agencies):

Egypt nung Islamic kiralongrartem ta temulung meleme bilemertemi Coptic Christian telok ka amakdang, nisung 26 tepset aser 26 yirutsü.

ISIS-0i Egypt nung aliba Coptic Khristantem amaktsü ta tenangzükba agia metetdaktsüogo. Egypt linük nütsung yongsük noklang nung Coptic Khristantem ya shilem 10 shi lir aser parnok ya Egypt nung lisopurtem lir.

Cairo anüdoklentip tsütsü aliba Minya Province nung Khristan ketdangser kati ashiba agi, kiralongrartemi jagi Monastery of St. Samuel-i aoer truck aser bus gari amak.

Khristan tamanger telok nungjagi tanur asem dang yiruyibong kecha mesüi kümzük, ta paisa ashi.

Nisung 26 asüba osang jangjaogo saka ano teimba asütsü akok, ta Egypt Health Ministry otongdar Khaled Mogahed-i ashi.

"Onok monastery tong aotsü atema tetsüdaktsü aika ajurur kechiyong monastery ji lisem lima tiyongtsü nung lir. Iba osang angashia, onok kanga süngmanger. Kiralongrartem jagi tanurtem dena tepsetogo" ta Minya province nung Khristan ketdangser Ibram Samir-i

metetdaktsü. Kiralongrartemji parnok nisung 8 nungi 10 shi liasü aser parnok military uniform sübor liasü ta tenük agi angurtemi kuli agütsü.

Iba tatalokba atema telok shingia tenung agiba osang memetetdaktsü saka tesüiba mapang aser ita ishika tsungda Islamic State (IS) kiralongrartemi Coptic pur makyonga aruogo.

Yaküm December ita tenlaki ka amakba atema ISIS-i tenung agiogo. Ani taküm April ita Palm Sunday nung tenlaki ana amakba atema-a parnokisa tenung agia sangdongogo. Iba lendong nung nisung 49 taküm sama.

Tan ita tetenzüklen tu ISIS-isa Egypt nung Khristantem amaktsü ta nangzükba osang metetdaktsüogo.

"Onoki nenok dang Khristantem aser army o police adenshiba tesemtem nungi pila alitsü metetdaktsür" ISIS-i hopta shia adokba Al Naba nung metetdaktsü.

Nübo agi tangar memenepertem kanga bulua amakba ajanga Egypt Tir, Abdel Fattah al-Sisi-i emergency sangdongogo aser talila bilemloka oa amangertem nungi nübortem kümzuka ayutsü ta metetdaktsüogo.



Ao Theological Association 31 buba kümsem inti Mungdang Longmisa yimtak May 26 aonung nungi tenzükogo. Iba Mungdang tenzükba sentong nung telok kentenba mapang agiba noksa nung angur. (Longmisa, May 26)

OLONG PAITEP # 4433

1			2			3			4	
			5		6		7			
			8							
	9									
										10
			11				12			
13						14				

TIPIEN

- 1. Anisungzükdak ki - (5)
- 3. Mangyimba mapang - (5)
- 5. Shisadang - (5)
- 9. Yar _____ - (9)
- 11. Temolung mekai aküm - (5)
- 13. Akhüm agütsü - (5)
- 14. Tsüngsak mopung - (5)

LANGTSÜNGLEN

- 1. Jaksü-bangsü - (4)
- 2. A _ _ _ isa - (3)
- 4. Kinunger / Sosem - (6)
- 6. Anema apusoba / Tekong merang - (7)
- 7. Tebang nung enoker achi - (5)
- 8. Küm ka chir - (5)
- 9. Moshia / Nangla nangshi - (6)
- 10. Yimsüsüba kümsük - (4)
- 12. Pei indang aküm - (3)

OLONG PAITEP # 4432 TELANGZÜBA

TIPIEN :

- 1. Tajang, 5. Berem, 6. Ung,
- 7. Nati, 9. Asü, 10. Tamagitsü,
- 12. Sak, 14. Joko, 15. Nga,
- 16. Anüng, 17. Tzürem.

LANGTSÜNGLEN :

- 1. Takar, 2. Jongdak, 3. Teki,
- 4. Lemtsü, 8. Tai, 9. Asangur,
- 10. Talang, 11. Aso, 13. Taküm, 14. Jina.



Bahadur-ba o Islam-ba na o tokteper

Islam : Hai temba....asen India lima nung Nashi metepsettsü, aser shirnoki Nashi tepsetdir, parnok-a Nashi tepsetba amaji tepsettsü ta-sa jembia angashir, ya kechi temzüng ozüng tesashi ka yanglur aka...???

Bahadur : Hauja temba... State aika nung Nashi metepsettsü... Nashi shi machitsü... aser shirnoki Nashi tepsetdir, parnok-a tepsettsü ozüng tesashi yanglur... kechiba süra Nashi-lai mamatzü agütsür aser la teküp agi shiküp oset aika yanglur....aser la temzüng agi plastic oset aika yanglur.... anungji Nashi ya kümzüka ayutsü kanga tongtibang adi....

Islam : O.K. sürabangla Nashi dang masü Nabong ya-a metepsettsüla aser shiri Nabong tepsetdir, parnok-a Nabong tepsetba ama tepsettsüla.... kechiba süra Nabong-laia mamatzü agütsür.... la teküp agi shiküp oset tajung aika yangluteter nung koda....ano aji tang masü Batak aser An itemla ajunga ya metepsettsüla.... kechiba süra parnok-ia Entsü kotsür aser la tezüng agi osettsüset tajung aika yangluteter....

Samuel : Ena temba..... asen India lima ya kin tulu-tila, tanak-temesüng aika dang meyoktepa aliba lima asünungji kin ajunga liromedema litettsüsa kin kati tangar kin kar anema mienyaksüla adi...

Lilir: L. Kika Pongener, Aoyimkum, Dimapur.

TANÜBO NAI LANGZÜANG

Q. 70buba World Health Assembly (WHA70) koba yimti nung tenzüka agidar?

- [A] Brussels [B] New Delhi
- [C] Paris [D] Geneva Hide

(Taruba adok nung onoki langzüksü)

YASHI ADOK TELANGZÜBA : Gayarul Hasan




Tanur asoba anogo nung salem osang den noksa angati adokdeksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tirymyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAIA YA METETER MA



Asia nung tetsür o tetsür na aser tebur o tebur na kibong akümstsü atema temelaba agütsüba mezüngbuba linükji Taiwan kümogo. Taiwan constitutional court-i tetsür o tetsür na aser tebur o tebur na kibong akümstsü atema agizükogo. Iba dak sendakba ozüng yanglushitsü mesüra ozüng tasen yanglutsü atema obendangertemi linük Parliament nem küm ana mapang agütsüogo.

SUDOKU # 3545

7	2				6 9 3
8			2		
	1 4		6		
	7 5 9			8 1	
5	8				
1			8	2 5 4	
2				3	8
	5		2		
	9 6 8 1		5	2	

TELANGZÜBA # 3544

4 6 7 8 2 3 1 5 9
5 1 9 6 4 7 8 3 2
2 8 3 9 1 5 6 7 4
6 5 2 7 9 8 3 4 1
9 7 8 4 3 1 5 2 6
1 3 4 5 6 2 7 9 8
7 2 1 3 8 9 4 6 5
3 9 6 1 5 4 2 8 7
8 4 5 2 7 6 9 1 3

OJANG LUTEP # 4039

- EMEDMRE : [][][][][][][]
- ANUMJGAT : [][][][][][][][]
- EDN : [][]
- MBADEME : [][][][][][][]
- NGDA : [][][]
- GUNOBIN : [][][][][][][]
- REMDEEM : [][][][][][][]
- OKGIENHYN : [][][][][][][][]
- YUBAMA : [][][][][]
- GATBAUNJ : [][][][][][][][]

OJANG LUTEP TELANGZÜBA # 4038

ASEN SENTONG DANG NUNGIBO
ASEN ATEMA TSÜNGREMER SENTONG TAJUNGBA LIR

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Nai kanga junga meteta aliba nisungtem den külemi tanü mapa inyak tajungba asütsü. Aser parnok den yimjung yanglutsü merangang.




Taurus
20/4-20/5

Nai tanü nisung aika kanga süngjema angutsü südi aser tangari ashiba o ajakbo nai mamangtsü merangang.



Gemini
21/5-20/6

Tanü maparen kar nung nü shilem kija inyaktsü merangang aser nisung kar den nai jembishinüba ajanga na shisa tajung angutsü südi.



Cancer
21/6-22/7

Kibung ka nungi süaka nisung shia shisatsü balala alir. Anungji tanü nür kinungertem indang tebilemba nü den lemsatettsüsa nai sentong kar yangluang.



Leo
23/7-22/8

Tanü mapa kar nung nür medemer den yaritepa inyaktsü merangang aser nü dak tanishir sempet lir ta parnok nem metetdakjang.



Virgo
23/8-22/9

Nai jangraba mapa nung nü tashi agüja inyaktsü asoshi tanü mapang tajung asütsü. Medemer kar nungi teyari agia nü mapa inyang.



Libra
23/9-22/10

Nai tanü mangatettep kar ajurutsü südi, aser iba ajanga tangar molungjang nai metettsü. Mapa kar nung temolung ulushir inyaktsü mapang arutsü.



Scorpio
23/10-21/11

Nai jangraba mapa inyaktsü asoshi tanü mapang tajung lir. Nü tsüngsü nisung aikati repringtsü, anungji nü mera kümdanga meraang.



Sagittarius
22/11-21/12

Nü mapa nung tangar teka ia meinyakdaktsütsü merangang. Asung anogo asoshi bilemang aser nü mapa meilongi inyang.



Capricorn
22/12-19/1

Tanü nai mapa inyaktsü asoshi tangar jilu majitsü merangang. Nai nukla tajung yur meranga inyakba ajanga takok angutsü.



Aquarius
20/1-18/2

Tangar yimya repringa nai shilem agitsü merangang. Nai ashiba o magizükteter den nü mapang teindok, kechiasür nai inyaktsü mapa aika lir.



Pisces
19/2-20/3

Na müketa aliba nisungtem nai tanü jungjunga metettsü merangang aser tangar den tesendaktep tajung ayutsü merangang.

Film ya Critics tem asoshi masü saka nüburttem asoshi lir: Arjun Kapoor



Mumbai, May 26

(Agencies): Actor Arjun Kapoor-i shilem agiba film Half Girlfriend ya nüburttem aikati kanga tenünga sanga agizükogo saka review tembo kanga jangratemrara masü, aji saka actor-i ashiba agi, movie temji nüburttem asoshi yangluba lir.

"Nisung ajak pei pei tebilemdangba balala lir aser aji ni memelenshidaktettsü. Critics temi aiben parnoki jangraba film

tapu ka repringner, saka parnoki nüburttem ama temolung lapoka film repringtsü nüngdaker. Film yangluba maparen nung nüburttem temolungdang yur yanglutsü kanga tongtibang kechiyong film tem ya nisung isheka shirnoki parnok critics ta ajar parnok asoshi masü saka nüburttem atema lir," ta Arjun-i ashi.

"Box office nung ni shilem agiba film tem takok angudang ni kanga pelar kechiyong box office ajanaga film ka takok anguba sayur. Nüburttemi box office nung ticket alira ni kechiba tezüdanga bilemtsü," ta pai shisem.

Maneni Arjun-i Kashish Mumbai International Queer Film Festival 2017 lapokba sentong nung o jembia liasü. Iba ya annual LGBT sentong ka lir aser 2010 nungi tenzüka Mumbai nung kümshia monga

arudar. Iba film festival nung India aser international film tem; gay, lesbian, bisexual, transgender aser queer community dak sendakba film tem screen asür.

Iba film festival indang jembidang Arjun-i ashiba agi, "Nüburttemi ajak nungeta yaritsü nüngdaker ta ni bilemer. India nung film tapu ajak yanglur, saka nüburttemi onok Bollywood film tem nung dang shilem agir ta bilemer. Actor ka ama film tem nung shilem agitsü asoshi kecha telatet ka mali. Asenok democratic lima ka nung alir aser nisung ajaki pei jangraba film yanglutettsü. Iba amala film festival ajanga sempet tajung aketba artist tem nem tetushi tangutsü tim sabang tuluba nung agütsür. Sempet akaba nisungtem parnoki shimba mapa asoshi masü saka parnok sempet asoshi tendangtsüla," ta pai maneni shisem.

Manchester lendong ajurur nem teyari agütsütsü asoshi Tom Hardy-i JustGiving nung page ka lapok

May 26, 2017 (Agencies): Manchester nung kiralongrar temi lendong adokdaktsüba nung tesama aser takoksa ajurua aliba nisungtem nem teyari agütsütsü asoshi sen bendenba sentong ka JustGiving ajanga page ka Tom Hardy-i lapok.

'Taboo' actor aser arishi küm 39 tain, Hardy-i The British Red Cross ajanga lendong ajurur alir nem teyari agütsütsü asoshi May 24 nung iba page lapok.

Pai lapokba page, 'Tom Hardy's Manchester Emergency Fund' ajanga sen £15,000 bendentsü nukjitung liasü saka Brehostibar anepdang tashi nung sen £18,000 dak tali bendener liasü.


Manchester Arena nung Ariana Grande-i concert agütsüba repringer tanaben kidangi meyiba aoba mapang pei temang nung bomb alenloker pokdaktsüsang, Salman Abedi-i bomb pokdaktsüba ajanga

nisung 22 asü aser aika yiru.

"Yasung AG concert Manchester nung kechi atalokogo, ibai kanga tesasatsü lir, kibong aser tanurtem kümzüka pelateba concert ajitsüba tesem ka nung parnok dak iba lendong adalok," ta 'Peaky Blinders' nung tongti shilem agisang-i lapokba page indang rasaa zülutsü aser mapa tajung tila ka agi takoksa tia ajurur aliba nüburttem yaritsü ajungshi.

"Tasü mait aser taochi makai samartsür aliba takütem tanaben meyiba anir arutsü makoktsü. Kü tenük agi anguba nung ni kanga aoksa aser kiralongrar ya temenen lir," ta pai zülutsü.

Hardy ya jabaso ana tebu lir, arishi küm 9 aser 1. Jabaso ana rongnung tanubusang ya pa kinungtsü Charlotte Riley tena tanur lir. Hardy indang JustGiving page ya Hombarnü lendong asoshi teyari sen



bendentsütsü asoshi lapokba page 150-shi rongnung ka lir aser tang tashi nung item telok ajanga sen million £2 dak tali bendena lir.

"Kiralongraba ajanga tekolok-a menentsür, tai maliba kibong aser tanurtem tepsetba ya shingaia magizükteter. Aser parnok tai maketer lendong ajurur aliba nüburttem den kü asükhu aser tejashi lemsateper. Imlibilema nai akokba agi yariang. Kanga pelar," ta Hardy-i iba page nung zülua lir.



Cannes, May 24: Irish actor Colin Farrell, U.S. actress Kirsten Dunst, U.S. actress Elle Fanning, U.S. director Sofia Coppola, Australian actress Nicole Kidman, U.S. producer Youree Henley, Australian actress Angourie Rice aser U.S. actress Addison Riecke (tabelen nung tachichi) nunger "The Beguiled" film screening mapang tangokba noksa nung angur.

TAN HOPTA ATEMA - KOMA SÜLA ?

Q Nagaland nung senzüba taxi aser auto rickshaw ajak ya Naga nungertemi dang anitsüla ta ozüng kuma latet nunga koma süla?

Olong 20 shi nung May 26, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

Mark-i Harvard doktsür kum 13 sülen Honorary Degree agizük



Massachusetts, May 26 (Agencies): Mark Zuckerberg-i Harvard University doktsür kum 13 sülen tanaben arua honorary degree agizükogo. Ivy League school-i pa tanaben arua graduate asürtem den o jembu.

Facebook indang CEO-i kaketsir den jembu tenzükang,

"Ni metongtetba mapa ka nünoki tongtetog," ta ashi.

Harvard College nung Zuckerberg ya 2002 kum tenüng züluok aser kum ana lir pai degree monguteti iba kaketsir reju doktsü. Tang arishi kum 33 tain, Zuckerberg-i social media sapang ya 'Thefacebook' tenüng nung 2004 kum Harvard nungi

saya aser iba mapang Priscilla Chang ya ajuru.

Harvard dorm room nungi pai minute 24 indang video ka yanglu aser pelashishia sentepa alirtem den jembu.

Par tsüraburtem-a arua pa den yariteba pa indang osettem bener ao aser par medemertemi tatembang benjung ka ayungzük.

Zuckerberg-i Facebook ya pa indang drom room nungi 2004 kum tenzük. Iba sapang ya mezüng bo Harvard nung azüngertemi dang amshia tenzük saka tang bo iba sapang amshir billion 2 ajungtsü mapang ka lir.

Kum ter shi süyio, Bill Gates-a kasa Harvard nungi degree monguteti anenadok. Apple indang co-founder, Steve Jobs ya Oregon nung aliba Reed College nungi degree monguteti kum tum nung college doktsü.

Offer balala dener Mumbai nung Idea 4G sayaogo

Mumbai, May 26 (Agencies): 2100 MHz spectrum brand nung tanü Idea Cellular indang 4G service Mumbai nung sayaogo. Company ajanga ashiba agi Mumbai nung iba network amshir züngsem million 4.4 lir aser shishilembaba nung shilem 10.2 iba tesem nungi jungdaksür.

Iba network amenlokba mapang Mumbai nung telecom site 3,500 nungi 1,600 bo 4G service-i upgrade sütsüogo aser anu site 1,000 kobi melie upgrade sütsüsü.

Mobile subscriber temi Mumbai nung tanü nungi tenzükba Idea 4G service indang tekera ya 34 Mbps angutsü. Iba service tenzükba nüngtem nung 'Invitation offer' anogo 90 atema iba network amshir million 4.4 alir nem agütsüsü aser kasa mapang züngsem tasen akümertem nema 4G SIM alir ajak nem iba maongka agütsüsü.

'Invitation Offer' ya Mumbai nung tang tamshidak alir Prepaid aser Postpaid costumer million 4.4 aser iba offer mapang züngsem tasen akümer nem 4G indang data GB 10 angadi amshitsü agütsüsü. Iba maongka ya

2017, May 25 nungi August 22 tashi alitsü aser Idea indang 4G network nung 4G SIM aser 4G handset asütsüla.

Tang amshia aliba customer tem 4G SIM melener nem anogo 14 asoshi 4G data GB 4 agütsüsü.

Invitation offer dak alaka iba anogo 90 tsüngta 4G handset alirtemi züngsem kümra sen 395 agi recharge asüba ajanga anogo 84 atema tanen maka local aser national nung jembitetsü, anogoshia 1GB data 4G/2G atema agütsüsü.

Customer tem jenjang tajemba nung amshinürtemi sen 192 jenjang Unlimited Combo Offer agitetsü akok. Iba maongka ajanga Mumbai aser Maharashtra tesemtem nung alirtem asoshi anogo 28 atema 4G/2G data 1GB agütsüsü.

Sen 148 agi recharge asüba ajanga Idea prepaid amshirtem India ajunga nung Idea nungi Idea den jembitsü asoshi maongka agütsüsü aser 300 MB Data agütsüsü.

Sen 348 agi recharge asüba ajanga India nung network ajak den anogo 28 angadi jembitetsü aser 4G handset amshir nem anogo shia 1GB

4G/2G agütsüsü.

Anu maneni Idea ajanga Mumbai nung 'Magic Recharge' agütsür. Iba 'Magic Recharge' ya sen jenjang 63 lir aser prepaid amshirtem asoshi anogo ana nungi 28 tashi amshitsü atema 1GB 4G/2G agütsür.


'Magic Data' ya sen jenjang 152 lir aser iba maongka nung anogo 28 atema GB 1 nungi GB 10 tashi agütsür (4G/2G).

Postpaid amshirtem atema maongka yamai alitsü. 4G invitation offer aser 4G SIM upgrade asüba sentong ya postpaid costumer temia amshitetsü. Iba den külemi postpaid atema 'Unlimited Plan' rental sen 349/499/649 jenjang nung angadi tanen maka jembitetsü, anogoshia 4G/2G GB1 aser sen 649 indang plan nung 'outgoing roaming' angadi asütsü. Iba den külemi sen 499 aser 649 plan nung SMS angadi angutsü.

Iba sentong tasen sayaba tenüng nung postpaid costumer tasen nem ita trok asoshi sen 50 agi tajemba nung 'Unlimited Plan' ya agütsüsü.

Taküm sa Idea ajanga 2G, 3G aser 4G service ya tesem 300,000 nung amenloktsü sentong lir.

Airtel, Idea aser Vodafone nem TRAI-i temerenshi agütsüba ya sorkari reprangdangtsü: Manoj Sinha



New Delhi, May 26 (Agencies): Reliance Jio nem Points of Interconnection (PoI) shidak magütsüba atema Telecom Regulatory Authority of India (TRAI) ajanga temerenshi senchi achitsü 'proposal' agütsüba ya sorkari mapang shidak nung reprangshitsü.

New Delhi nung osangbener den senden ka amenba mapang TRAI-i temerenshi agütsüba nung sorkar koba nung nokdaka lir, ta asüngdangdang, "Proposal ya arudakjang aser onoki reprangdangtsü. Mapang shidak nung onoki lemtetsü," ta Communication Minister, Manoj Sinha-i ashi.

Telecom operator asem, Bharti Airtel, Vodafone aser Idea dang TRAI-i senchi sen crore 3,050 achi.

TRAI-i iba shidi ya telecom department nem Bodhbarnü agütsüogo.

Department of Telecommunication ajanga asüngdangba ka telangzüba agütsüba nung TRAI ajanga Licence Service Areas (LSA) nung ajemdaker iba senchi ya achi, ta shia lir. Airtel aser Vodafone-na prong dang senchi sen crore 1,050 achi aser Idea dang LSA 21 aser 19 atema sen crore 950 senchi achi.

LSA temzüng nung aliba aibelena Jio nem item telecom operator asem ajanga PoI shidak magütsü, ta TRAI-i taoba kum October ita aija liasü.

"Airtel, Vodafone aser Idea ajanga metetsümonga PoI ya Reliance Jio nem magütsür aser iba ajanga TRAI temzüng nung aliba ama meinyaker aser Reliance Jio amshir nem timtem agütsür," ta TRAI-i Department of Telecommunication nem agütsüba shidi nung shia lir.



shimtet. Arishi kum 23 tain Vian Amir ya Sulaimani province nungi lir aser tang la ya Baghdad nung aliba insurance company ka nung inyaker.

Baghdad, May 26: 2017 May 25 anogo Baghdad, Iraq nung Miss Iraq Pageant shimbama mapang Miss Iraq, Vian Amir-i osangbener den jembiba noksa nung angur. Kurdish beauty pageant Vian Amer ya "Miss Iraq 2017"



Mumbai, May 25 : Mumbai nung Brehostibarnü Tubelight film indang trailer sayaba mapang Bollywood actor Salman Khan aser Sohail Khan den film yanglur Kabir Khan nungertem külemi tangokba noksa nung angur.

OnePlus 5 mechi OnePlus 3T yangluba anentsü

May 26, 2017 (Agencies): OnePlus 5 smartphone flagship nem lenmang lapoktsüsü mechi OnePlus 3T yangluba anentsü atema company-i telemtetba agiogo.

OnePlus 5 phone ya India nung Snapdragon 835 chipset keta aliba phone mezüngbuba, ta Qualcomm India aser OnePlus ajanga metetdaksüba sülen iba maparen tasen ya inyaker.

OnePlus indang blogpost ajanga ashiba agi, OnePlus 3T alitsü asoshi tatembangbuba ajar aser iba smartphone ya

isheka dang anünga lir. OnePlus 3T ya 2016 kum jenjang talang nung phone tajung rongnung ka liasü.

OnePlus 3T aser OnePlus 3 atema software tasen yanglutetaka iba software atema warranty mali, ta company ajanga ashi.

OnePlus 3T smartphone ya OnePlus 3 yanglushiba lir aser iba phone ya 2016 kum June ita nung sen 27,999 yong saya liasü.

OnePlus 3T phone ya OnePlus 3 dang nungi processor tasenba, battery tuluba aser tejaklen camera tajungba lir.



New Delhi, May 26, 2017: Hokolbarnü New Delhi nung Congress Tir, Sonia Gandhi menden ser opposition party balala nungi lenirtemi taruba Tir election atema senden amenba noksa nung angur. Kasa noksa nungsa taoba Ato kilonser, Manmohan Singh, RJD tongti lenir, Lalu Prasad, JD(U) lenir, Sharad Yadav, NCP tongti lenir, Sharad Pawar, Trinamool Congress tongti lenir, Mamata Banerjee, CPI(M) General Secretary, Sitaram Yechury, Congress tatong Tir, Rahul Gandhi, Congress lenir tain, Mallikarjun Kharge aser BSP Tir, Mayawati nungera angur.

Ajaki melunga Tir candidate meshimra onoki telemtetba agitsü: Opposition

New Delhi, May 26

(Agencies): Hokolbarnü Opposition party temi, Tir election atema BJP den melungtepa Tir candidate ka shimtsü mekokra opposition-i telemtetba ka agitsü, ta metetdaksü.

Tang teinyakdak Tir, Pranab Mukherjee kümsük July ita nung tembanger.

Tanü Congress Tir, Sonia Gandhi-i BJP nung madenba party tem senden ayonga liasü, aser iba senden nung opposition party 17 aden.

Iba senden dak sendakba nung opposition party temi sangdong ka ajanga, "Tir aser tatong Tir menden atema election agitsü mapang ana nung lir. Teti agia sorkar tashi nung aliba party-i ketdangsüa tenüngtem benoker. Tang tashi nung iba atema osang kecha mali. Party ajaki

agizüktettsüsa candidate mesangdongra, onoki- asen linük temzüngtem nung aliba ama inyaksüsa candidate shimtsü," ta metetdaksü.

Tir aser tatong Tir election na dak alia opposition-isa, BJP sorkari sensakertem timtemdaksür aser Jammu & Kashmir nung tensa tamajungba kümdaksür, ta aitsü.

Opposition party tem sangdong nungsa, "Sorkari mapatong balala ajanga asen nüburttem, aluyimertem, mapa inyaktertem, lanurtem, SC/ST tem, minority tem aser lokti nung tepetzük tia nung alirtem nem khuret tali agütsüba anema Parliament nung opposition party tem longjemer nokdaksü. Jammu & Kashmir nung tensa tamajungba akümba atema opposition party temi tebilemtsü akar," ta shia lir.

Senden tembangba sülen osangbenertem den jembidang Congress lenir, Ghulam Nabi Azad-ia, tang tashi nungbo telemtetba agia mali, ta metetdaksü.

"Ajaki (sorkar aser opposition) agizüktettsüsa nübo ka shimtsü mekokra onoki telemtetba ka agitsü," ta paisa ashi.

"Inyakyim nung sorkar tashi nung aliba party-i ketdangsüa candidates tenüngtem (Tir aser tatong tir) benoker," ta Azad-isa ashi.

Tanü Sonia-i ayongba senden nung West Bengal Chief Minister Mamata Banerjee aser Rashtriya Janata Dal tongti, Lalu Prasad na densema opposition party 17 nungi lenirtem dena liasü.

Bihar CM, Nitish Kumar jelia sentong yanglua aliba ajanga pabo iba senden nung medentet.

EVM hackathon nung shilem magitsü: AAP

New Delhi, May 26

(Agencies): June 3, 2017 nü Election Commission (EC)-i ayongba EVM hackathon ya tamasa ka lir, ta aija tanü Aam Aadmi Party (AAP)-i, party-i iba sentong nung shilem magitsü, ta metetdaksü.

AAP-isa, kechiba EC-i ayongba- EVM raksatsü jazükba sentong nung tenokdangba kar benoker?, ta asüngdang.

"Iba ya EVM hackathon ka masü. Kechiba onoki iba tamasa nung shilem agitsü. Tang telatetba nung ajemdakerbo party-i EVM tayongzükba nung shilem magitsü," ta tanü Aam Aadmi Party Delhi Convenor, Gopal Rai-i ashi.

AAP-i Election Commission dang Electronic Voting Machine (EVM) hackathon nung EVM motherboard amshitsü temelaba agüjang, ta mepishia liasü, ajisüaka EC-i ibaji magizükba sülen tanü AAP-i iba tayongzükba nung shilem magitsü telemtetba agiogo.

EVM raksaa amshitsü


tayongzükba nung shilem agitsü atema tenüng agütsütsü asoshi yimtenren party tem nem Hokolbarnü tashi anogo agüja liasü.

"Tanüa onoki shidi ajanga Election Commission dang open hackathon asütsü mepishia liasü," ta Rai-i Delhi nung osangbenertem dang ashi.

"Election Commission-i nangzükba aliba nungi atsüngshia kechiba telatetbatem agütsür? Election inyakyim kümzükba ayutsüsa kechiba EC-i open hackathon mayongzükber?" ta paisa asüngdang.

Pai ashiba agi, hackathon nung temzüng ozüng mali, kechiyong security oset kechi südir süaka raksaa amshitsü atema oset mashie amshir.

Ano AAP lenir, Dilip Pandey-ia, techinal mongin aikatia shidi ajanga Chief Election Commissioner, Nasim Zaidi dang iba tayongzükba ya 'open hackathon' ka asütsü atema mepishiogo, ta metetdaksü.



May 26, 2017 nü Assam nung Ato kilonser, Narendra Modi-i linük nung apu talangtiba, Dhola-Sadia lapoktsüba sülen apu nung noksa tangokba angur. Gari asem tashi senzütettsüsa yangluba apu ya kilometer 9.15 talang lir, aser iba apu ya Brahmaputra ayong nung yimokba Lohit ayong nung yanglu.

Karnataka nung Yeddyurappa BJP CM candidate asütsü: BJP

New Delhi, May 26

(Agencies): Sangküm Karnataka assembly election nung taoba state Chief Minister, B S Yeddyurappa BJP chief minister candidate asütsü, ta Hokolbarnü BJP Tir, Amit Shah-i metetdaksü.

Osangbener den jembidang Shah-i, taküm Gujarat assembly election nung Chief minister

Vijay Rupani Chief Minister candidate asütsü, aser party-i menden 150 dak tema angutsü, ta metetdaksü.

"Karnataka election ji Yeddyurappa leniba nung tokteptsü," ta Shah-i ashi.

Arishi küm 74, Yeddyurappa ya tongtibang Lingayat lenir ka lir aser 2008 küm Karnataka assembly election nunga pa

leniba nung BJP-i takok ngua liasü. Ajisüaka pa anema ken o benokba sülen pa CM menden nungi alua liasü.

Iba sülen 2011 küm pai party tasen ka tentet, saka par party-i 2013 assembly election nung tamakok ngua liasü.

2014 küm Lok Sabha election agitsü mapang ana nung lia pa tanaben BJP dangi meyipa liasü.



New Delhi, May 26, 2017: Hokolbarnü New Delhi nung Tir, Pranab Mukherjee-i 2011, 2012 aser 2014 küm atema Social Understanding & Upliftment of Weaker Sections indang Dr. Ambedkar National Award agütsüba noksa nung angur. Kasa noksa nungsa Social Justice & Empowerment Union Minister, Thaawar Chand Gehlot den Ministers of State for Social Justice & Empowerment- Krishan Pal, Vijay Sampla aser Ramdas Athawale nungera angur.

IAF indang samaba tayimtsü nguogo

New Delhi, May 26

(Agencies): Anogo asem tejaklen Indian Air Force (IAF) indang raraba tayimtsü ka samaa liasü, aser tanü iba tayimtsü teraksa ngutetogo, ta osang ka ajanga ashi.

IAF ketdangser kati sangdong ka ajanga, "Tayimtsü teraksa nguogo. Tayimtsü teraksaji tesüsa osang agitepba tesem nung nguogo. Tang tsüngsang majung aser mepetzüsü lir. Maneni osang metetdaksütsü," ta metetdaksü.


Iba tayimtsü nungji pilot ana mena liasü aser iba lendong nung tena taküm mekümsük südi ta

bilemer.

May 23, 2017 nü iba tayimtsü den osang magiteptetba sülen nungi tenzükba iba tayimtsü bushia liasü. Ajisüaka tsüngsang majungba ajanga iba maparen nung takok mengui aruogo.

IAF sepaitem telok pezü, Indian Army telok teku aser state ketdangser telok anati tesem balala nung iba tayimtsü bushia liasü.

Tezpur Air Base nungi apusoba sülen Tezpur nungi kilometer 60 pilar tayimtsü indang radar aser radio tongtepratep makai aküm.



Taormina (Italy), May 26, 2017: Hokolbarnü Taormina, Sicily, Italy nung G7 linüktem senden nung (abelen nungi) European Council Tir, Donald Tusk, Canada Ato kilonser, Justin Trudeau, Germany Chancellor, Angela Merkel, US Tir, Donald Trump, Italy Ato kilonser, Paolo Gentiloni, France Tir, Emmanuel Macron, Japan Ato kilonser, Shinzo Abe, Britain Ato kilonser, Theresa May aser European Commission Tir, Jean-Claude Juncker nunger külemi tangokba noksa ka angur.

Sisily nung G7 linüktem anogo ana senden tenzükogo

Rome, May 26 (Agencies): Group of Seven (G7) linüktem anogo ananü senden tanü Hokolbarnü Taormina, Italy nung tenzükogo.

Britain, Canada, France, Germany, Italy, Japan aser United States linüktem nungi tongti lenirtem den EU-i iba senden nung kiralongra, shishilembaba aser alima tsüngsang mopung melenshiba densema tongtiban onüktem nung o lemteptsü.

Hombarnü Manchester, UK nung US tsür kentener, Ariana Grande kenten sentong nung kiralongrartemi amakba lendong nung nisung 22 tepsetba sülen G7 senden nung kiralongra onük ya tongti ser jembitsü, ta osang angazüker.

Iba telok nungi US Tir, Donald Trump aser British Ato kilonser, Theresa May na densema lenir pezü tang mezüng G7 senden nung adentsü, ta osang ka ajanga metetdaksü.

Iba senden nung US Tir, Trump dang Climate Change indang 2015 Paris Agreement medoktsütsü atema ajungshitsüa akok, ta kasa osang ajanga ashi.

Iba senden amentsü jelia White House Economic Adviser, Gary Cohn-i Sisily nung onük anaprongji kanga tongti süa jembitsüa akok, ta metetdakja liasü.

Kasa senden nung G7 senden amenba linük, Italy-ia Africa nung sen aika intoktsü aser bendangertem tanga linüki oa aliba onük süoktsüa akok, koba ajanga rara aliba tesemtem nungi nisungtemi tanga linüktemi oa aliba tebilemstü koktettsü. G7 lenirtemisa sustainable growth & development indanga jembitsü. 43buba G7 senden ya Honibarnü tembangtsü, iba sülen linük tenet lenirtemi külem sangdong ka agütsütsü imlar.

Ano tanga osang ka nung, tanü iba senden jelia Japan Tir, ShinzoAbe ajurua jurila senden ka amendang US Tir, Donald Trump-i, raratsü jangraba linük, North Korea tebilemstü ya koktettsü, ta ashi.

"Iba ya tebilemstü tuluka lir, iba ya alima tebilemstü ka lir," ta ashi.

Hopta ishika tejaklen US Tiri, North Korea lenir, Kim Jong-Un ya nuclear rara

osettem aliba sowar ka lir, ta aija liasü.

"N Korea-i missile aser nuclear tendangba ajanga kidanger linüktem aser alima tebilemstü akar. Iba onük ya tanga industrialised linük dena jembitsü," ta Trump-i ashi.

G7 senden nung Japan lenir, Abe-ia North Korea ajanga alima nem amokmeren tensa ka bener arutsüba indang jembitsü tebilemba lir.

Japan yimtiba, Tokyo nungi mapusodang pai osangbenertem dang, "North Korea onük ya East Asia atema dang masü saka alima ajak atema amokmeren ka lir," ta metetdaksü.

Taküm North Korea-i Hwasong-12 intermediate-range projectile ka densema missile aika tendangogo.

Ano yaküma parnoki nuclear ana tendanga liasü.

N Korea lenir, Kim ya menokdangra tesem nung Japan aser South Korea densema tanga linüktemia nuclear yanglutsüsa akümtsü ta US-i bilemer, aser iba dak sendakba nung US-i N Korea den ken o jembitsü meranger.


N Korea Nuclear sentong anema kümdanga inyaktsüla: Russia

Moscow (Russia), May 26 (Agencies): Russia aser China linük nati, North Korea nuclear programme tatemtsü ser Korean peninsula nung US global anti-missile system mamenoktsüla

ta bangjemogo, ta Hokolbarnü Russia Foreign Minister, Sergei Lavrov-i metetdaksü.

Moscow aser Beijing napronglai N Korea`er nuclear sentong anema inyakbaji

pusemer, saka iba tesem nung yimtenren nung tetsükdaksü magütsütsüla, ta Lavrov aser China Foreign Minister, Wang Yi nati osangbenertem dang metetdaksü.



May 26, 2017 nü Nicosia, Cyprus nung aliba Holy Wisdom Tenla kidang, 1974 küm Turkey nungeri amakba mapang Cyprus nung Greek nunger asürtem bendanga agütsüba sentong nung nisung kati Greek aser Cyprus wako agi aleper aliba tasümgang nung tebang mesepba noksa nung angur.

Syria nung civilian 100 shi tepset

Beirut, May 26 (Agencies): Syria kübok al-Mayadin jila nung Brihostibar nikonngang nisung 100 shi tepsetogo, ta Britain nung amenoka aliba Syrian Observatory for Human Rights ajanga metetdaksü.

US-i aniba coalition warplanes-i iba tesem amak aser idangji tanurtem dena asü aser asürtem rongnung ISIS züngsemtem indang kinungertem dena liasü, ta SOHR-isa ashi.

US-i anir ISIS anema raraba telok nung otongdar kati ashiba agi, May 25 aser 26 anogo parnoki al-Mayadin anasa anüng nung tayimtsütem amshia amak aser iba osang metetpeladar.

Tayimtsü amshia amakdang tanur 40 dak tema süogo aser al-Mayadin indang municipality building auyi küma samatsüogo, ta Observatory-isa metetdaksü.

US-i teyari agüja nungitba Syrian Kurdish aser Arab rarartemi ISIS den kanga

meranga raraba ajanga Raqqa nung alirtem aika iba tesem toktsür jena ogo, ta parnokisa shisem.

Yasüng 7:25 ako (1625 GMT) meta yimti nung alirtemi aircraft aser warplanes yimzüba angu aser iba sülen mapang tatsüka lir külen tayimtsütem nungi kiojen ana dak missiles khaloktsü. Kiojen ana nung ISIS züngsemtem rongnung Syrian aser Moroccan kibongtem liasü. Iba sülen ayaterm süir tayimtsütem nungi tesem aika amak, ta Syrian Observatory for Human Rights-isa metetdaksü.

Syria aser Iraq nung ISIS tashimeiti kümogo aser parnok anema rarartemi tesem aika parnok ket nungi meyipa agiogo.

United States-i aniba teloki ashiba agi, parnoki tayimtsütem ajanga amakdang civilian tem taküm melalutsü atema kanga dang kümdanga mapa inyaker.

Sri Lanka nung anentsüh aser tzümetsüng lendong nung nisung 91 asü



Colombo (Sri Lanka), May 26 (Agencies): Hokolbarnü Sri Lanka linük nung tesem aika nung anentsüh aluba sülen anentsüh aluba tesem ka nung nüburtemi tasümgang bushiba noksa nung angur.

Colombo (Sri Lanka), May 26 (Agencies): Hokolbarnü Sri Lanka nung anentsüh aser tzümetsüng lendong nung nisung 91 süogo aser nisung 42 tashi samaogo, ta tanü Disaster Management Centre-i metetdaksü.

Linük nung item lendong agi kongshiba tamajungtiba tesemji Kalutara lir, aser iba tesem nung nisung 8,000 jungnüai pei talidak ki toktsür ogo, ta DMC-isa metetdaksü.

"Taonung tashi nung nisung 91 asüba aser nisung 42 samaba osang lir," ta DMC-i sangdong ka nung metetdaksü.

Sri Lanka nung tzünglu agi takümsa tamajungba teraksatsüba bener arutsüdar.

2016 kümMay ita nunga linük yimtiba, Colombo nung tenemzük tesemtem nung tzü metsüngba lendong ajanga nisung noklang ka dak tema süa liasü.

Sri Lanka sorkari Kelani ayongküm nung aliba nüburtem

dang, iba ayongtzü kanga kera metsüngdar, anungji kanga kümdanga alitsüla, ta metetdaksüogo.

Teyari maparen balala inyaktsü atema sorkar mapa inyakertem nem sodi magütsütsü sorkari sangdongba den külemi taruba ghonda 72 kanga kümdanga alitsü nüburtem dang metetdaksüogo. Brihostibarnü nungi tenzük linük tesem aika nung tzünglu sashia aruba ajanga gari lenmang aser ki aika tzü agi metsüngbangogo.

Ano Sabaragamuwa province nungbo ketdangsertemi school tem melapoktsü metetdaksüogo.

N ü n g d a k b a p u r t e m kümzüksü atema tzüyim sepai 100-i rong 20 amshia kümzükba maparen teinyakdak lir.

]Ano Air force-ia helicopter aser tayimtsü amshia rongdak nüngdak kümzükba maparen inyadar.

VIGILANCE COMMISSION**NAGALAND : KOHIMA**

NO.E.VIG-23/2010

Dt. Kohima, the 26th May/17

NOTIFICATION

This is to inform all the candidates who had applied for the post of LDA- Cum- Computer Assistant for Konyak Tribe only in the office of the Vigilance Commission, that the interview will be held on 13th June 2017 (for candidate bearing Roll No. 1 to 60) and on 14th June 2017 (for candidate bearing Roll No. 61 to 118)

All the candidates who had submitted their application earlier are hereby inform to collect their Admit Cards w.e.f. 29th May/17 to 5th June/17. No extension of time will be given to the applicants who fail to collect their cards within the stipulated time.


(SEHJANG DOUNGEL)
Secretary
Vigilance Commission
Nagaland, Kohima.

Issued by: DIPR

Molungnen O

Temeim Obala asür
Madangluen (Yimjenkimong)
shiranga aliba mapang nungi
asü yipden tashi, kija, kibong
aser lokti balala ajaki nübo,
rongsen, shisatsü aser
sarasadem agi onok nungita
yariogo, nenok ajak dangi
tsüngtong arua tepela
melemsateptet nung iba
osang kaket ajanga nenok ajak
den ozü tepela lemsateper.

Nenok temeim mapatem
onok mulungjang nung teti
alitsü. Teyanglur Tsüngremi
nenok ajak moajang ta ozü
sarasadem.



(04.01.1935 - 21.05.2017)

- Chirnur, Semchir & Adianutem.

GOVERNMENT OF NAGALAND**STATE COUNCIL OF EDUCATIONAL RESEARCH & TRAINING
NAGALAND: KOHIMA**

NO.SCERT/SBTE/PSTE/Notice/6/2010-11/

Dated Kohima May 2017

Information**2- Year Diploma in Elementary Teacher Education (D.El.Ed)**

Applications are invited from intending candidates for undergoing the 2- Year Diploma in Elementary Teacher Education (D.El.Ed) under the SCERT, Nagaland, for the session 2017-2019.

Requirements:-

1. Minimum Required Qualification: - P.U/ 10+2/Hr. Secondary passed in any discipline with atleast 45%.
2. Maximum age limit:- 28 years.
3. Admission Forms will be issued w.e.f 1st June 2017 to 20th June 2017 at SCERT and in all the DIETs, v.i.z DIETs, Chiechama, Mokokchung, Mon, Tuensang, Pfutsero, Dimapur, Wokha, Zunheboto, St. Paul Institute of Education, Phesama and Salt Christian College of Teacher Education, Dimapur on payment of Rs 200/- .
4. Last date for submission of the Application Form Dully filled: - 23rd June 2017.
5. Interview for selection will be conducted at SCERT, Kohima for DIET Chiechama and also at DIETs Mokokchung, Tuensang, Mon, Dimapur, Pfutsero, Wokha, Zunheboto, St. Paul Institute of Education, Phesama and Salt Christian College of Teacher Education, Dimapur.
6. The Date & Time for Interview will be on 29th June 2017 from 10.00 A.M at the respective centres.
7. A selected candidate may be deputed to any of the institute mentioned above at the discretion of the Department.
8. All original documents must be produced during the interview.
9. No T.A/D.A will be paid for attending the Interview.

(KHRIETUO MEZHUR)
Director
SCERT, Nagaland, Kohima

Issued by: DIPR

V.J'S COACHING CENTRE
D.C. COURT ROAD, DUNCAN, DIMAPUR (ESTD. 2000)

ADMISSION GOING ON

⇒ Offer Extensive Coaching for the Repeaters of
Class-X / XII-Arts / XII-Com / XII-Sci. for
Improvement & Repeaters

⇒ Hostel attached for both Boys & Girls (Separately)

Contact : 03862-248394 / 248464 / 9436600530

ADMISSION OPEN 2017-2018**EDUAIDE CAREER & COUNSELING SERVICE**

EduAide Career under Divine Bridge Ministries and Ao Students Conference to provide Free Service, Guidance & Counseling for admission to various courses in different parts of India for all the Naga students. Direct admission will be given to deserving candidates.

MBBS /MD	Horticulture
BDS/MDS	B.Sc. Nursing
Engineering(all branches)	MBA/BBA
Architecture	Pharmacy, Law
Agriculture	Hotel Management
Forestry	Paramedical
	Fine Art,Animation

Featured Facilities:

- Concession in fees for the students from Nagaland
- Colleges affiliated to central university and approved, recognised by UGC/HRD
- Colleges verified and approved by expert team
- Educational loan and Scholarship facilities
- We do provide service for MBBS admission abroad

Application forms available at : AKM office, Mkg, DBM office near Cornerstone Higher Secondary School, Duncan, Dimapur. Contact: Mr. Supongchiten: 09718225382, 8700695549, Apokla; Edu. Secy. AKM, 9612585019, Arenla, Dimapur; 9077508292

ML aser Skill Education topper nem sempet... (Tapak 1 nung...)



May 26, 2017 nü Raj Bhavan Kohima nung Angh P B Acharya, Minister Yitachu aser tangartemi HSLC Toppers 2017 den külemi agiba noksa angur.

Kaket shisatsü bushibaren nung tesayubatem angazükba dang masü saka kaketshirtem dak aliba sempettem ajungkettsü atema sabang agütsütsüla. Talisa, kaketshirtemi pei tetsü oshi jungjunga angazüksüla kechiyong iba jagi pei maitsü kümzüka ayutsü. Anungji, tetsü oshiji züngzünga aser temulung agüja sayutsüla, ta Acharya-isa shisem.

Paisa, nija rejutemi takok tajungba anguba atema tenüngsang agütsü aser nija rejutemi sen angutsü atema dang masü saka kaketshirtem tajungba nung anitetsü atema temulung agüja inyaksüla, ta ayongzük.

School Education & SCERT Minister, Yitachu-ia o jembidang, "Nagaland nung kaketshirtem aikati Class-III nungi Class-XII tsüngda züngtor anener, anungji tsüraburtem, tesayurtem aser kaketshir tajungtemi, tangar memenepba kaketshirtem ajungkettsüla" ta ayongzük.

"Kaketshirtemi tematiba jenjang nung takok angubaji kanga dang tajung saka iba ya tatembang masü, saka tetenzüker ang lir ta angatettsüla. Nenok alizüng atongtsü atema timtem aremtsüla" ta School Education & SCERT Principal Secretary, F P Solo-ia kaketshirtem ayongzük.

Külen, NBSE Chairperson

Asano Sekhose-ia tematiba jenjang nung takok angurtem dang, "mark aser grade anguba dak alia, shisaliokji angazükba indang lir. Nenok takok angur ka asütsü atema, tangar yaritsüla aser parnok peladaktsütsüla. Tanü nenoki takok anguba ajanga tanga kaketshirtem nem osang sangoktsür aser nenoki züngyonga aodang, maneni tangar ajungmesotsü liang" ta ashi. Sentong nung UBC Kohima Pastor, Rev Dr Rachülie Vihienuo-i tenüngsang agüja sarasadem aser Ministers' Hill Baptist Higher Secondary School o Neingusalie Yano, HSLC 2017 Music Topper nungeri ken ajanga shilem agi.

MDLSA-i orphanage home nung painting tetoktepba agi

Dimapur, May 26 (TYO): Jushon-i tasembuba jenjang Mon District Legal Services takoktem angu.

Iba sentong nung Legal Aid Council MDLSA N. Mannon Konyak, Panel Lawyer MDLSA Dominic Kaiba, Panel Lawyer MDLSA M. Moba Konyak, PLV MDLSA Tingkai, PLV MDLSA Penngam, PLV MDLSA Miss Phamsa aser PLV MDLSA Nyemin nungertem aden.

Iba orphanage home ya Mon nungi kilometer 55 shi pilar lir.

Tetoktepba class 4 aser class 5 kaketshirtem atema liasü aser Ngamzie-i mezüngbuba jenjang, Jungan-i tanabuba aser nungertem aden.

31 buba ATA mungdang... (Tapak 1 nung...)

Tanü arogo tiaji "arogobo tajung saka arogopur majung aser arogobo takar saka arogopurbo sensaker", ta asüba jenjang nung lir, ta paisa sasaba olen ka ashi.

Paisa laishirtem nem inyadaktüsüba kar ashidang, ochimashi temenen mapatemji tashiyim agi masü saka azü metokshii ochi aser sarasadem agi raratsüla, ta paisa ayongzüka ashi.

Tenzükba mapa nung tatidang aika arutsüa akok saka Tsüngrem dak dang rangloker inyakra, temenen mapatemji asenoki koktettsü, ta paisa

ayongzüka ashi. Hokolbarnu aonung 31 buba ATA inti mungdang tenzükba sentong nung ATA Director Talijungla-i iba mungdang omen "Loktilibaliru aser inyakyim nung ochi taküm" ta asüba nung ajemdaker Tsüngrem o jembia liasü.

Iba sentong ya May 28 tashi alitsü aser sentong nung Rev. Dr. Takatemjen aser Dr. P. Kilemsungla nati omen dak ajemdaker onük balala jembitsü aser Rev. O Alem, Rev. Dr. Mar Atsongchanger aser Wb. Tsüknung parnoki Tsüngrem osang abentsü.

Angati Football coaching camp tembangogo



Kohima Local Ground nung free coaching camp tembangba sülen NFCA President Roko Angami den coach tem aser asayarterm agiba noksa angur.

Kohima, May 26 (TYO):

Kohima Local Ground nung Nagaland Football Coaches Association (NFCA) ajanga anogo pongu angati football coaching agütsüba sentong tanü tembangogo.

"Make Football Happen" omen nung ajemdaker iba sentong nung football asayar arishi küm 6 nungi 12 tsüngta aser Under-17 nem tesayuba

balala agütsü.

Iba sentong nung adenertem den tepela o jembidang, iba sentong tembangaka maneni practice alitsü asoshi NFCA tir, Roko Angami-i ajungshi. Asayaba kisüng masü saka lesson azüngba nunga temolung agüja azüngtsü pai-sa ajungshi.

Pai maneni iba sentong nung atener dang coaches anasa kisüng discipline shidak

amshitsü masü saka parnok dang tainba nisungtem akhum tsübua takok angutsü asoshi temoatsü meshitsü ajungshi.

Iba ama sentong ya Dimapur nung mezüng ayongzüka aka aser Kohima nung tanabuba sentong aka, maneni NFCA ajanga iba ama sentong ya tanga district tem nunga ayonga amongtsü, ta Roko-isa shisem.

Kevilekho-i Nagaland State Chess Challenger akok



May 26, 2017 nü Red Cross Conference Hall nung NCA ketdangsertem den 16 buba Nagaland State Chess Challenger nung takokertem külemi agiba noksa angur.

Kohima, May 26 (TYO): 16buba Nagaland State Chess Challenger indang open category nung Kevilekho-i takok angu.

Red Cross Conference hall, Kohima nung tanü final asayaba nung pai progressive points 40 ngua Khrielle Sano madak takok angu.

Mezüng jenjang nguteter nem sempet sen 15,000 den trophy aser kulikaket agütsü aser tanabuba jenjang nguteter Khrielle Sano nem sempet sen 10,000 den trophy aser kulikaket agütsü.

Tasembuba jenjang nung Mughaho Awomi nem sempet sen 7,000 den trophy aser kulikaket agütsü aser pezübuba jenjang nguteter, Sede Nagi nem sempet sen 5,000 den

trophy aser kulikaket agütsü. Viseyie Yano, Melesai Dahuo, Pikuto Chishi, Nikehiezo Zinyu, Thepfuchalie Mere aser Ropfuovilie Nagi nung temi jenjang 5, 6, 7, 8, 9 aser 10buba tongtet aser parnok ajak nem sempet sen 1000 den kulikaket agütsü.

16buba Nagaland State Chess Challenger nung temaba jenjang pezü nguteter tem-i state tenüng nung 54buba National Chess Challenger 2017, August 3 nungi 23 tashi Gujarat nung shilem agütsü.

Under-17 category nung Kendriya Vidyalaya Khakhuti Dimapur nungi Sourav Singh-i mezüng jenjang nguteter aser pa nem sempet sen 5,000 den trophy aser kulikaket agütsü. Mezhür Higher Secondary

School Kohima nungi Nipeto Hesso tanabuba jenjang ngutet aser pa nem sempet sen 3,000 den kulikaket agütsü.

Coraggio School Kohima nungi Shenikali Hesso-i tasembuba jenjang, Mount Sinai HSS Kohima nungi Suliki Awomi pezübuba jenjang aser Coraggio School Kohima nungi Pulonito Hesso-i pongububa jenjang ngutet. Parnok nem sempet sen 2,000 aser 1000 agütsü.

Nagaland Chess Association nung ketdangpur tasen shimba yamai alitsü; tir, P. Khezhe, tatong tir, Sukhavi Achumi, honorary secretary - Hekugha Yephthomi, Melasayi Dawhuo aser Mughaho Awomi ya joint secretary. Ruopfuovilie Nagi ya NCA kimen asütsü.

India nung nashi...

Ozüng tasentemji taruba ita asem tsüngda mapa küma inyaksü tebilemba lir. Tang nungi talir aser tayokertemi maitsü aser kibur indang kulikakettem amshitsüla.

Nashi ka alizükba sülen, shishilembar kati iba nashi ayokba indang kulikaket pungu yanglutsüla aser ka

local revenue office nem, ka talir aliba district nung local veterinary doctor nem, ka animal market committee nem aser tanüngba anaji talir aser tayoker nem agütsütsüla.

Taoba environment minister Anil Madhav Dave-i pa masüdang ozüng tasentem

(Tapak 1 nungi...)

mulunga agizüka liasü, ta ministry osang kar ajanga metetdaksü.

March 2017 tashi nung India kübok state aser Union territory tem noklang nung shilem 84 tashi nung nashi tepsetba nokdanga aliba osang bushitetogo. Ibaji linük yongsük nung shilem 99.38 shi lir.

N'Dam-Murata tanaben tsüntepshitsü WBA-i tetendanger 2 anentsür

Tokyo, May 26 (Agencies): Taoba hopta France nung Hassan N'Dam aser Japan nung Ryota Murata na tsüngtepba nung ashishitep adoktsüsa telemtebba agiba atema World Boxing Association (WBA)-i tetendanger ana anentsüogo aser iba N'Dam o Murata na tanaben tsüngtepshitsü atema tetuyuba agütsüogo.

Tokyo nung tsüngtep dang Murata-i tajungba tsüngtep saka tatem nung N'Dam nem ang takok agüja liasü.

Panama nungi Gustavo Padilla aser Canada nungi Hubert Earle nati iba tsüngtepba nung points shitak magütsüba atema, tena ita trok atema anentsür, ta WBA tir, Gilberto Jesus Mendoza-i metetdaksü.

"Ni points agütsüba den ano tanga tetendaner pungu aser asaya ketdangsertemi agütsüa point ji Padilla o Earle nati agütsüba den khenyongi balaka

liasü" ta Mendoza-i osangbener senden ka nung ashi.

"Ni iba ken o ya süoki ia bilem aser ni iba atema telemtebba taoba Honibar aonung agiadok. Ajisüaka, onoki tetendanertem indang telemtebba jungjunga shisadanga reprangba sülen ang, tanü tena anentsüba osang metetdaksü" ta yashi Mendoza-isa metetdaksü.

N'Dam aser Murata na tsüngtepba nung tetendanger anati N'Dam nem 116-111 aser 115-112 takok agütsü saka tasembuba tetendangeribo Mendoza-i Murata nem agütsüba ama 117-110 agüja liasü.

"Tamasa ni Murata, Teiken Promotions aser Japanese boxing sapurtem ajak dang tadok meshir. Telemtebba shitak magütetba atema ni kanga jashir. Ni championship committee dang tena tanaben tsüngtepshitsü atema tetuyuba agütsütsü" ta WBA tir-isa metetdaksü.

Narendra Modi-i India... (Tapak 1 nungi...)

Iba olenji Arunachal Pradesh Literary Society (APLS)-ia mulunga agizükba metetdaksü.

"Asen linük nung iba ya kanga dang tongtipang infrastructure project tem rongnung ka lir" ta tanü Modi-isa ashi.

Sen crore 2,056 endoka yangluba apu lapoktsüba sülen Modi-i apu nung tetsüng agi tatsüka jaja ao. Iba sülen Prime Minister, Union Minister Nitin Gadkari, Assam Governor Banwarilal Purohit, Chief Minister Sarbananda Sonowal aser tongti ketdangsertem gari ka mener apu manung süi.

Tarun Gogoi-i aitsür

Ajisüaka, Assam chief minister Tarun Gogoi-ibo apu talangtiba yangluba atema BJP-i aniba Centre sorkari tenüng agiba atema aitsüogo.

Gogoi-i ashiba agi, iba apu ya Congress-i shisateta yanglutsü tenzükba liasü.

"Iba apu yanglutsüba ya onoki shisatet aser 2009 nung Union Cabinet-i agizük aser 2011 nung mapa inyaksü tenzük. Navayuga Engineering Company Ltd nem apu yanglutsü mapa lezmüksü" ta Gogoi-i metetdaksü.

Paisa, taoba prime minister Manmohan Singh aser taoba road transport minister Oscar Fernandes na dang pelaba metetdaksü.

"Onoki Manmohan Singh aser taoba surface transport minister dang iba apu yanglutsü mulunga agizükba atema kanga pelar. Iba ya Assam asoshi sempet tulu ka lir aser Assam nungertemi iba sempet atema teti tena dang pelatsü" ta Gogoi-isa shisem.



Gold Coast, May 26: Gold Coast, Australia nung TOTAL BWF Sudirman Cup 2017 nung China nung Lu Kai (abelen) aser Huang Yaqiong nati mixed doubles match Group 1 nung India nung Satwiksairaj Rankireddy aser Ashwini Poppanna den asayaba noksa nung angur. Iba asaya nung Lu Kai aser Huang Yaqiong nati 2-1 agi akok.

BILEMDANGANG

"Tamachi nisung ka den raratepba ajanga tamachi ana lir ta sayur."